

東

華

錄

東華錄

雍正十八

臣王先謙敬編

臣周滄蕃恭校

雍正九年辛亥春正月乙丑朔諭內閣朕思惠養黎元之道莫先於除賦蠲租使萬姓均沾渥澤陝西甘肅二省經理軍需迄今數年凡米糧芻牧車馬牲畜之類皆動支公帑備辦一絲一粟不使擾民然朕每念地方既有軍務縱不取辦於民財未嘗不資藉於民力而陝甘二省之民人踊躍趨事甚爲可嘉年來已屢降蠲賦之旨茲特再沛恩膏將雍正九年西安所屬額徵地丁銀蠲免十分之三甘肅所屬額徵地丁銀全行蠲免該督撫等可轉飭有司敬謹奉行務令閭閻均霑實惠○庚午命工部左侍郎馬爾泰協辦西安軍務正紅旗滿洲都統德成協辦青海噶斯軍務○副都

統達爾奏噶斯卡倫見被賊圍臣將關防交與爾滿岱並調取西甯綠旗兵三百名防範番子臣親率兵出邊往援柴旦木地方若賊人敗遁卽領兵追襲得旨達爾領兵前往應援格默爾等亦是但奏稱追襲甚屬孟浪巴爾庫爾之兵原爲搗賊人巢穴而設噶斯之兵乃爲駐防而設若來犯噶斯之賊兵無多勢均力敵則卽行勦殺儻以全力擾動青海則噶斯隘口屬無用之地卽撤兵退至近邊形勝之處會集青海之兵駐紮防守儻賊勢頗重卽領兵退入邊內爾從前曾將西甯之兵調撥五百名今又爲番人調兵三百如果番人有所爾之三百兵丁何能濟乎兵力宜聚而不宜分類類分調是何計策防守邊圉較防守青海尤爲急務目今止宜堅守切不可急遽躁妄○乙亥諭大學士等準噶爾賊人乘我西路軍營不備傾其醜類犯我卡倫盜趕駝馬總兵官樊廷等領

兵二千轉戰七晝夜擊殺賊眾又將盜去駝馬牲畜奪回樊廷忠
勇冠軍頗得勝算總兵張元佐副都統綽般台吉袞布三等台吉
定弔拉錫領兵應援奮力夾攻大敗賊人副將張朝良以孤軍被
困而能全師出圍凡此將弁皆見義能勇致身效力均屬可嘉樊
廷著賞銀一萬兩給一等阿達哈哈番張朝良治大雄俱著賞銀
五千兩給拜他喇布勒哈番張元佐綽般俱著賞銀三千兩給拖
沙喇哈番台吉袞布著封公爵三等台吉定弔拉錫著授爲扎薩
克一等台吉其餘有功將弁俱著大將軍岳鍾琪查明奏聞加恩
從優議敘再著署內務府總管鄂善馳驛前往肅州於軍需銀兩
內動支十萬兩令大將軍將此番出征弁兵等查明戰功等次按
名賞給至陣亡將弁兵丁分晰查明造冊具奏從優賞卹該督撫
動用正項錢糧於安西地方建立忠勇祠將陣亡之將士等設造

牌位致祭俾義烈將士永遠流芳以示朕崇獎忠勲之至意○癸未諭內閣劉聲芳在太醫院效力有年屢加特恩用至戶部侍郎伊於部務茫無知識上年夏秋閒朕體偶爾違和伊並不用心調治推諉輕忽居心巧詐深負朕恩著革去戶部侍郎仍在太醫院效力贖罪行走從前所賞伊子廕生及舉人俱著革退戶部侍郎員缺著左都御史史貽直兼署冀棟朕聞其通知醫理加恩用至副都御史乃伊識見昏庸遇事推諉著革去副都御史補授御醫之缺效力行走○甲申諭大學士等準噶爾賊眾侵犯西路汎界盜竊駝馬乘我不備事起倉卒其力戰克敵者甚屬可嘉而授命疆場者尤爲可憫前已降旨令建忠勇祠春秋祭享以表忠節矣茲應賞給世職令其子孫承襲永誌恩施副將徐宗仁著給與拜他喇布勒哈番守備劉貴才劉芳雨李國勳俱著給與拖沙喇哈

番其應得卹典仍著該部察例具奏千總王大謨徐維新外委把總方正劉世勳俱著該部從優議卹此外如有應加恩卹之弁員俱著大將軍岳鍾琪查明具奏凡陣亡兵丁於卹賞定例之外俱倍加賞賜其隨役人等有受傷亡故者照兵丁卹賞定例給賞朕今以酒三爵遙酌陣亡將士著署內務府總管鄂善將酒齎往軍營凡陣亡將士每名以羊一隻奠祭朕憫惻傷悼至意朕不得已而用兵本期全師克敵不損一人乃爲至願豈必捐軀致命始稱效忠報國乎今此陣亡弁兵朕雖加恩優卹而惻怛不忍之念愈覺難釋於懷著鄂善將朕諭旨徧行宣布令眾知之至所賞賚銀十萬兩鄂善至軍營時或與大將軍岳鍾琪或與護大將軍印務紀成斌分別將弁兵丁建功出力之等次秉公賞給務使均沾恩賜以示國家酬庸獎勵之令典○乙酉諭內閣朕聞洞庭一湖

縣亘八百餘里自岳州出湖以君山爲標準一望杳渺橫無涯際而舵桿洲居西湖之中去湖之四岸或百餘里或二百餘里舟行至此儻遇風濤斗作無地停泊亦無從拯救多有傾覆之患昔人曾經勦議若於此處建築石臺則狂風巨浪之中商船有挽泊之所實有裨益止以水中立基工用浩繁事不果行朕以勤求民瘼爲心凡內外遠近地方疏濬修建工程可以利濟羣生者無不樂爲興舉况商賈行旅之往來可以避風波之險而登衽席之安尤事之亟宜舉行者查營田水利衙門有存公銀二十萬兩著解送楚省交與總督邁柱會同巡撫趙宏恩遴選賢能之員相度估計悉心經理建築石臺以爲行舟避風停泊之所務期修造堅固垂諸永久毋得草率塞責○丁亥諭內閣山東地方上年遭值水患窮民乏食朕心軫念屢頒諭旨並遣大臣賜粟賜金加恩賑濟不

忍使一夫不獲其所又念上年該省禾稼歉收則今春青黃不接之時米價必致騰貴特命截畱鄰省漕糧三十五萬石撥運奉天米穀二十萬石減價平糶以惠濟閭閻朕之爲東省民食計者亦備極籌畫矣細思上年濟兗東三府之被水較平時爲甚今發粟平糶固不慮價值之高昂而赤貧之民仍苦於糶買之無力且聞被水之後有餬口轉徙四方者今各省漸次資送回籍此等民人回籍之後無以爲資勢必至於失業深屬可憫著侍郎劉於義牧可登巡撫岳濬確查實在窮民無力糶買穀石者再給兩月口糧以恤其困苦資其耕作查濟兗東三府尙有存倉穀四十萬石卽將此爲散賑之需儻不敷用再將截畱之漕糧以二十萬石平糶以十五萬石增添散賑著該侍郎等遴選賢員作速分投辦理使黎民均沾實惠並傳宣朕旨曉諭百姓等受朕格外之恩當乘此

春和努力耕種勿因失業而作邪僻之事勿因困厄而懷怨尤之心果能祇遵朕訓則豫順之氣自能感召天和賜以安全之福思之勉之○戊子封喀喇沁塔布囊羅布藏策布登爲輔國公○己丑賜大學士張廷玉贊猷碩輔蔣廷錫萬機賢輔扁額○庚寅諭內閣上年江南邳宿等十八州縣遭值水患窮民乏食朕心深切軫念特命大臣會同該督撫動帑發粟撫綏賑恤增給口糧之數加添散賑之期並賞給修葺屋廬之費務使被水黎民咸登衽席今據該督撫等奏報正月十五日已滿散賑之期朕思江南麥熟在四月之杪其間青黃不接之時尙應爲之籌畫雖本省鄰境皆有平糶之米穀而赤貧之民無資糶買者仍復艱於餬口深可憫惻查揚州鹽義倉有積穀數十萬石原備賑濟之用著動支二十餘萬石加賑窮民四十日口糧以濟其困乏資其耕作該督撫會

同欽差侍郎彭維新等悉心奉行並曉諭百姓乘此春和盡力南畝勿再游手失業有負朕痼瘝軫恤之至意○辛卯轉彭維新爲吏部左侍郎調吳士玉爲吏部右侍郎胡煦爲禮部左侍郎以任蘭枝爲兵部右侍郎

由內閣學士遷

二月乙未命撥奉天米二十萬石通倉米十五萬石又採買五萬石運赴山東備用其東昌以下近水州縣命截留湖廣江西漕糧三十萬石存貯○寶授喀爾吉善兵部左侍郎○多羅愉郡王允禩薨報朝二日賜祭二次造墳立碑謚曰恪○戊戌諭大學士等肅州甘州涼州移駐滿洲兵四千名又涼州有歸化城兵一千名尙無統領之員甯夏滿洲兵見今不過六百名著戶部右侍郎傅泰前往署理甯夏將軍印務其肅甘涼等處兵丁著常賚前往給以鎮安將軍印務令其統領仍聽大將軍岳鍾琪調遣○己亥以

孔毓璞爲左副都御史仍畱肅州辦理軍務

由甘肅布政使遷

○庚子諭

理藩院布魯克巴部落人等互相讎殺貝子頗羅鼐遣使解和宣

朕威德甚屬可嘉著封爲貝勒伊子一等台吉珠爾麻特冊登屢

次領兵效力邊疆著封爲輔國公○以溫而遜爲山西按察使

由湖

南岳常道遷

○吏部議覆福建總督劉世明等條奏臺灣事宜一臺灣

府南面向隸鳳山北面向隸諸羅管轄者俱應改歸臺灣縣管轄

一臺灣縣羅漢門地方緊要請以臺灣縣縣丞移駐與汛弁互相

防察一鳳山縣萬丹地方請添設縣丞一管轄淡水枋寮口等處

其原設淡水巡檢移駐大崑麓一諸羅縣笨港地方煙戶繁多奸

良莫辨請添設縣丞一令其查拏巡緝其原設佳里興巡檢移駐

鹽水港一彰化縣距大甲溪一百五六十里溪北更爲遼遠一切

錢糧命盜等項悉令赴縣殊屬不便請將大甲溪以北地方歸淡

水同知就近管理從之○壬寅吏部議准廣東總督郝王麟奏廣東肇慶二府屬地處低窪沿河田禾惟賴圍基堅固俾免水患始獲有秋向例屬縣丞管理但縣丞駐紮邑中潦水驟發猝難兼顧惟巡檢所轄地方與民最親偶遇潦漲圍基危險即可督率鄉民救護南海三水高要三縣事繁請以縣丞爲督理巡檢爲專管高明四會兩縣事簡請以知縣爲督理巡檢爲專管每年按時督率修築凡遇潦水漲發如防護稍有貽誤入於大計內分別劾參從之○甲辰移福建臺灣淡水同知駐竹塹添設臺灣貓霧揀鹿子港竹塹八里坌大社等處巡檢各一○乙巳諭大學士等駐藏之官弁兵丁等已經數年未曾更換朕心甚爲軫念查從前派往之兵係陝西一千名四川一千名今陝西兵丁見有征勦準噶爾之事難以派往西藏四川新募充伍之兵甚多著提督黃廷桂巡撫

憲德酌量於新舊兵丁內揀選二千名前往西藏將從前駐藏之兵換回其弁兵等自總兵以至千總亦應更換若大員內一時不得職銜相當之人可揀選幹員加銜委署前往○己酉王肅章緣事革職以刁承祖爲湖北按察使由湖南糧驛道遷○辛亥 上親耕藉田○壬子添設湖南六里吉多坪同知一經歷一排補美隆團寨等處巡檢各一○癸丑以王蘭生爲內閣學士由翰林院侍讀學士遷○甯遠大將軍岳鍾琪奏軍機事宜十六條一吐魯番地方饒沃宜廣爲屯種一吐魯番通伊犁之路逆夷出入經由必須嚴設卡倫一準噶爾之所屬回子先宜收撫一巴爾庫爾等處宜多派兵丁以資戢守一襲擊逆夷使其不安駐牧一駐紮土魯番兵丁之駝馬宜酌定數目一領兵官員請爲添派一牧放馬駝羊隻應嚴加防範一酌添羊隻以資兵食一巴爾庫爾之新城宜積貯糧石一綠

旗兵之餘丁無庸添設一車兵之器械請爲酌增一移兵駐紮吐魯番宜豫爲定期一屯種之農具耕種宜豫爲辦運一吐魯番巴爾庫爾兩處駐防宜通聲息一進剿兵數宜豫爲酌定得旨大將軍岳鍾琪陳奏軍機十六條朕詳悉披覽竟無一可採取之處朕心深爲憂煩岳鍾琪以從前輕言長驅直入之說又爲賊夷盜趕駝馬旣恥且憤必欲襲擊進剿勉強踐復前說若以今日之勢命伊統領大兵直搗巢穴能保其必勝乎奏辦之事皆未妥協大學士等將朕旨傳諭之○乙卯諭大學士等陝甘二省年來辦理軍需雖皆動用正項錢糧民間無絲毫之費然輸輓糧運伺候差徭不無勞苦朕已降諭旨加恩獎勉但必得地方大吏仰體朕心凡料理軍務固不可任其延緩而過於迫急未免擾民查覈錢糧固不可聽其浮銷而過於苛刻則必至剝民督撫等大員嚴緊一分

則州縣官必於百姓加緊一倍如能寬容一分則小民必得一分之惠武格馬爾泰二人急公之心皆切但恐諸事過於苛迫可將朕旨傳諭凡承辦州縣或於原額之外遲緩無多而其人之才有可用者不妨略示寬容其開銷物料腳運之費亦必斟酌時價不可刻意覈減但此旨不可宣露於人恐有不肖之州縣借此遷延浮冒其漸不可長也○丙辰吏部議覆署直隸總督唐執玉奏天津直隸州係水陸通衢五方雜處事務繁多辦理不易請升州爲府設知府一糧捕通判一經歷一教授一訓導一附郭置天津縣設知縣一縣丞一典史一改州學正爲教諭此新設一縣同該州原轄之青縣靜海及滄州南皮鹽山慶雲一州三縣統歸新升之府轄其舊設之河間府海防同知應就近改屬天津天津舊設之州同吏目應裁霸昌道屬之寶坻縣廣袤六百餘里其毗連之梁

城所距寶邑甚遠一切公務該縣不能兼顧請將寶坻縣之江窪口起至西頭莊止南路一帶割歸梁城並改所爲縣設知縣一典史一教諭一訓導一舊設所千總一應裁從之尋定天津新升府曰天津梁城所新改縣曰甯河○戊午諭大學士等準噶爾父子濟惡背天逆理狡獪百端爲邊方之巨患朕繼述先志綏靜西

陲特遣兩路大兵聲罪致討數年以來慎選將士輓運軍需區畫周詳備辦饒裕而三軍之氣鼓勇直前人人思奮朕常敎以古者聖人之訓臨事而懼好謀而成天道惡盈謙沖受益軍氣當壯而軍心則不可驕此我將士及在廷臣工所共聞者也上年正月間西路大將軍岳鍾琪奏報雍正七年十二月二十八日夜巴爾庫爾軍營有紫氣祥光絳亘東北歷四時之久光華絢爛二月間又據署總督查郎阿奏報鞏昌府屬之靖遠衛紅觜子地方乃黃河

過渡之所每年正二月間東風解凍河冰漸薄冰橋旣難行走渡船亦難撐駕行李停滯歲以爲常乃今年正月官運糧車至此冰忽開融舟行無阻誠從來未有之奇遇等語朕覽奏不敢遽以爲喜輒行宣示於外特命封貯內閣以待大軍凱旋卽此可以知朕心矣此番西路撥派之將士皆遴選訓練之精銳其氣勢倍覺壯盛遂未免有恃強輕敵之心以致賊人乘我不備侵犯境內搶掠牧場並傷我兵弁豈軍志驕矜有干盛滿之戒 天心特以此示儆耶上年被賊侵擾之處朕與大將軍岳鍾琪等不能計慮於事先實難辭疏忽之過至於軍營牧放駝馬最宜布置有方乃以牲畜置於賊人來路之旁又與大營相隔遼遠被賊人乘機盜竊則審度形勢之謂何岳鍾琪更難辭咎又如達爾統領噶斯之兵曾奏請製辦皮套等物以爲兵丁手足禦寒之具而西路兵丁去冬

出戰之時冒犯冰雪手足凍傷者多有則亦大將軍未嘗畱意於平時也凡此既往之錯追悔無益從來勝負乃兵家之常禍福有倚伏之理從前因疏忽而致虧損將來自可小儆而成大功惟望合營將士等以敬謹之心辦理戎事以忠義之勇對越上天自可仰蒙 上帝慈恩默垂保護書云皇天無親惟德是輔况準噶爾罄其所有甲兵不過三四萬之眾卽以上年之事論之小策零敦多卜係伊防守西拉百爾要地之首領乃於冬閒傾其人眾犯我卡倫我軍以數百人固守小營彼不能奪並不敢萌窺伺大營之念僅於中途以全力邀截我師四路畢集而我總兵官樊廷張元佐等以數千人擊敗彼數萬之眾則賊之力量伎倆不過如是而已蓋彼之所長在於偷盜駝馬而我師一時失於防範遂爾墮其術中並非彼之兵力有餘也觀賊之虛張聲勢分兵侵擾噶斯卡

偷窺伺圖呼魯克之糧石我師以百餘人即可防守而追逐之則更鼠竊狗偷之行不堪之甚者也總之行軍之道心不可驕而氣不可餒凡我將士務去從前驕矜之心而鼓將來勇敢之氣候朕徐徐籌畫必有蕩寇萬全之勝策俾將士等歡欣鼓舞奏凱歌而膺爵賞也其軍營得傷患病之兵丁著用心調治務令痊可朕正籌畫加恩使之更換休養以恤勤勞著大將軍將朕此旨通行曉諭出征將弁兵丁知之○再免西安所屬本年額賦四十萬兩○免西安肅州兩路兵所借帑銀○己未諭內閣上年秋月山東地方山水爲患卽聞河南亦有數縣被水朕以總督田文鏡身在地方自能經理妥帖冬間見總督邁柱奏摺知豫省被水之民有覓食餬口於湖廣者該省已陸續資送回籍朕又切諭田文鏡督率有司加意撫恤且念豫省連歲豐稔今不過數處歉收自可支持

度日不至困窮失所是以未遣專官前往查賑今聞祥符封邱等州縣乏食窮民沿途求乞而村鎮中更有賣鬻男女爲山陝客商買去者田文鏡欲將說合之中保媒人拘拏懲治至於鄉村有糧之家多被附近窮民呼羣覬覦於昏夜之中徧勒借貸有司不能究問朕聞之深爲駭異朕以愛養百姓爲心惟恐一夫失所卽如上年直隸山東江南被水之州縣朕皆疊沛恩施豈獨於豫省之民靳茲膏澤田文鏡近來年老多病精神不及故爲屬員所欺誑耳夫賣男鬻女之事在平時亦有之此乃出於本人之情願非官長所可禁止者至於荒歉之歲自以撫綏安插使民不至離散爲第一義若不能撫綏安插而但禁其賣鬻子女以避離散之名是絕其生路也豈爲民父母者所忍言乎刑部侍郎王國棟向曾在豫省居官著給與欽差大臣關防馳驛前往將被水之州縣一一

查明飛飭該地方官動用本地倉穀錢糧覈實賑濟務使窮民咸登衽席不得稍有遺漏俟麥熟之後奏聞停止儻地方官奉行不善怠忽從事著王國棟嚴參重治其應行緩徵之州縣著傳朕諭旨卽行緩徵以免追呼之擾○命陳世倌回河南按察使任調高斌爲河南布政使以白鍾山爲江蘇布政使由淮徐道遷○予故兵部左侍郎永壽祭葬○壬戌諭大學士等朕思川陝二省地方數千里甚爲遼闊今西邊有辦理軍需之事總督一員難於控制向來川省曾設總督今仍著添設四川總督一員卽以提督黃廷桂補授○是月免直隸天津大城等三十四州縣雍正八年水災額賦又免兩淮通泰淮三分司所屬茆濱等五場雍正七年水災折價銀兩有差

三月甲子朔諭喀爾喀王貝勒等爾喀爾喀原係大部落因爾等

先是但知好佛誦經廢弛戎務曾被噶爾丹戰敗爾等受 聖祖
仁皇帝恩養教訓四五十年練習武藝非比從前之怯懦去歲準
噶爾賊人乘西路軍營不備盜竊馬匹總兵官樊廷等率兵二千
救援卡倫與二萬賊兵交戰殺賊甚多旋即遁歸儻賊人入爾等
遊牧之地爾等當乘時努力報恩雪恥朕遣兵進剿準噶爾原非
利其土地人民特爲爾等不能安甯之故耳其深悉朕意各加奮
勉毋忽○丙寅諭大學士等甯遠大將軍岳鍾琪先後接到所降
諭旨辦理諸務雖較之從前所奏略有頭緒而中間尙有錯謬之
處如將肅州駐紮之固原甯夏兵丁二千五百名撥到軍營者原
以補缺少原額也又奏稱將此二千五百兵與撥出口之西安兵
一千名涼州兵五百名駐紮圖呼魯克毛垓圖等處若北路一有
調遣卽將此兵丁從庫庫拖米之路赴阿濟卡倫應援如四千名

兵尙不敷用再於軍營內挑選精兵四千名於哈喇烏蘇直赴畢
濟卡倫應援等語北路滿漢兵丁及察哈爾等處兵丁三萬餘名
加以喀爾喀數萬之眾豈有尙資藉於西路應援之理設賊人果
傾其全眾犯我北路則西路之師自應直向木魯河賊人畱駐之
所及伊爾布爾和邵放卡之處搶擄其牲畜剿滅其人眾又何暇
分其兵眾以作應援之師乎且阿濟畢濟去北路大軍之營尙遠
賊人能越我軍營而至尙勞西路應援之兵乎此等設施實未妥
協至請將滿洲歸化城兵丁交與常賚帶領至西安駐紮與朕意
相符及將圖呼魯克糧石運交軍營收貯所議亦爲允協應照所
請行○乙亥諭大學士等甯遠大將軍岳鍾琪署總督查耶阿因
聞賊營脫回兵丁藍生芝傳說噶爾丹策零帶領部落家口移駐
哈喇沙爾並有四月初一日小策零多敦卜會兵去犯北路之言

薛畫四條具奏隨傳問多爾濟波羅特據稱哈喇沙爾係回子所
住耕種之處相近有小城多科魯勒克其地氣候炎熱又甚隘小
僅可容千餘家四面係開種田畝不能牧放多爾濟在哈喇沙爾
居住最久波羅特亦親聽彼地人傳說二人言的確與否雖未必
盡然大約其地之不甚寬大可知噶爾丹策零若欲移駐於此必
率其全部而來少亦一二萬人哈喇沙爾果能容此大眾乎且以
情理論之伊犁爲賊之巢穴西北與圖爾古特哈薩克接境實皆
賊之讎國噶爾丹策零又安敢舍其巢穴而遠居於哈喇沙爾乎
如果率其大隊住於吐魯番相近之處則賊之注意在我巴爾庫
爾軍營而岳鍾琪乃云賊人由吐魯番一路直侵哈密截我營站
乘勢侵擾安西肅州沿邊一帶等語據多爾濟波羅特俱云哈喇
沙爾至吐魯番雖有路徑皆係沙磧其自吐魯番至哈密亦由沙

磧大隊難行一沿南山係一綫細路又須仍從巴爾庫爾經過然後得達二人之言果確則賊眾不能從哈喇沙爾直至吐魯番而吐魯番一路不能直侵哈密也明矣設賊人欲侵犯哈密巴爾庫爾大營之大軍豈竟任其出入而令阻截臺站乘勢侵擾安西肅州乎至云賊人以大隊全赴西路攻我軍營賊勢甚眾我軍眾寡莫敵當持重戒嚴堅壁固守一面知會北路遣兵應援一面飛調綠旗滿洲蒙古兵丁由無克克嶺三面攻擊等語從前事起倉卒彼時軍營兵馬無幾是以諭令岳鍾琪儻賊夷以大隊再犯當持重堅守以待應援今則見在軍營馬步車兵約有一萬九千餘名加以安西甘肅之兵六千名續派兵四千名共二萬九千名是兵不爲寡矣夫樊廷以馬步二千敵彼二萬轉戰七晝夜猶足以相當乃以二萬九千人之眾而云眾寡莫敵何懦怯至此且從前尙

欲直至伊犁搗其巢穴豈有賊人來至數百里內而無剿殺之策
轉堅壁而不出乎獨不思我軍堅壁不出僅賊但虛張聲勢作攻
我軍之狀而分其眾以侵擾圖呼魯克塔爾那沁哈密等處阻截
營站斷我音問此時將任賊於軍營近地肆行無忌乎岳鍾琪又
欲以圖呼魯克毛垓圖及西安之滿洲蒙古官兵由無克克嶺會
合夾攻賊人若果至巴爾庫爾賊卽敗逃亦從闊舍圖一路直走
伊爾布爾和邵而遁無克克嶺相去二三百里安所得夾擊之又
云賊夷或令吉穆察之兵侵犯軍營而以哈喇沙爾之賊侵犯青
海查哈喇沙爾之至青海必由噶斯噶斯之口甚隘斷不能行且
賊人旣遣人侵犯大營彼豈不虞我軍之勦殺自必畱哈喇沙爾
之眾以爲援應又何敢分其眾侵犯青海乎至慮賊之率其醜類
悉赴沙洲等處尤爲背謬賊若由噶斯伊孫察罕齊老圖而進則

此數路斷難容走萬餘人若由大道而來又不知何法可以越我巴爾庫爾軍營而過也岳鍾琪於口外地方形勢茫然不知於軍務機宜亦覺昏憤凡巴爾庫爾軍營築城之要策及大軍剿賊之勝算並未籌及而但將旁枝末節盈篇累牘備極周詳朕披覽之下實爲煩憂如藍生芝所聞賊人有搶卡倫牲畜踐踏禾苗之語不思賊人若來搶奪我卡倫牲畜我獨不能剿戮此搶奪之賊乎賊人可以踐我禾苗我不可以乘其踐踏而擒之乎岳鍾琪何以但能慮賊而不知籌已也又藍生芝云有哈密回子報信領路等語哈密回子之不可信由來已久亦當諒其苦情益其力量微弱遣準噶爾之陵虐恨之入骨而畏之如虎其或偶然通信於賊者乃恐懼之至爲將來自全之計我軍固不可不留意隄防然不可使彼有疑懼之心我之軍力能庇護哈密自不爲賊所用岳鍾琪

不必因藍生芝之言而深究也至西鳳二府運糧一事原因軫念甘肅連年輓運軍糈民間不無煩擾是以特命范時繹到彼協同巡撫武格侍郎馬爾泰將西安鳳翔二府米石運至甘肅涼州以資軍食武格等議行本運之法俾西鳳二府官民任轉運之勞甘肅地方少得息肩朕意深以爲然今岳鍾琪查郎阿又爲遞運之議是與雍正元年設臺盤運相同將來必有派撥協濟之累或更以交接卸責至將米石灌水攪沙從前誤累豈可復蹈爾等可傳諭岳鍾琪等知之○湖廣總督邁柱遵旨將沔陽州實在民欠糧銀三萬二千餘兩分晰造冊具題得旨朕愛養元元時下減賦蠲租之詔每思豁除舊欠則頑戶獨蒙恩蠲免新糧則善良均被澤此亦情事之易知者惟是沔陽民欠與他處不同該州近水常有湧溢之患朕所深悉其未完民欠銀兩著從寬豁免○戊寅工部

議准江南河道總督嵇曾筠會同巡撫尹繼善奏江南黃運兩河工程關繫運道民生設官分職必須因地制宜隨時通變請將宿桃中河通判改爲宿遷運河通判安清中河通判改爲桃源安清中河通判其海防同知應移駐董家營改爲分管山安南岸河務海防同知江防同知改爲揚河江防同知並添設董家營巡檢一把總一從之○免直隸霸州文安等七州縣未完民欠糧米二萬一千六百餘石○庚辰吏部議准江西巡撫謝旻奏江西吉安廣信二府屬皆有永豐一縣文移印信不無混淆請另改嘉名以免滋弊從之尋定廣信府屬永豐縣曰廣豐○壬午諭大學士等紀成斌聞賊人侵擾吐魯番之言卽令樊廷等領兵四千前往應援此舉甚屬錯謬朕已降旨嚴切申飭至於從前採買吐魯番糧石本應給與運價令其自送軍營乃計不出此而遣官發駝遠行搬

運致啓賊人偷盜之心及至去冬逆夷猖獗之後猶不將辦糧之
弁兵撤回此則疏忽錯誤之甚者也惟是朕之怙冒萬方之心若
坐視吐魯番之被寇侵陵而不爲之籌畫保護朕心又有所不忍
從前原曾降旨與吐魯番人眾若畏懼準噶爾卽移向近邊之地
居住是以拖克拖麻穆忒帶領之人移駐近邊者皆享安甯之福
可再行曉諭回子等伊等儻自揣力不能敵不妨仍爲移避之計
朕當從厚賞給盤費並令地方官善爲安插使之得所若此番曉
諭之後伊等仍復觀望則賊人再來侵擾之時聽伊等自爲之計
我軍不便護庇矣○癸未諭內閣朕欲於在京官員內揀選老成
明白者數十員命往陝西內地州縣辦理宣諭化導之事著大學
士會同該教習於庶吉士內揀選數員各部堂官在本部學習人
員內揀選一二十員國子監祭酒等在選拔貢生內揀選二三十

員俱交送內閣帶領引見○大學士等議覆靖邊大將軍傅爾丹奏北路軍營遵旨築城查科布多地方按連布婁爾與庫里野圖相近係進兵大道請於此處築城從之○乙酉以三泰爲禮部尙書由左都御史遷○戊子大學士等遵旨議奏臣等謹將襲封一二三等公十員並伊等先世開列名單恭擬美名進呈 欽定擬撰誥命給與始封襲封之員其宗室外戚公應照禮部原議宗室封爲奉國公外戚封爲承恩公一併給與誥命得旨一等公圖海定爲忠達公一等公賴塔爲襲績公三等公恩格德爾爲奉義公一等公鰲拜爲超武公一等公圖賴爲雄勇公二等公圖爾格爲果毅公三等公費英東爲信勇公三等公多尼庫魯克爲建烈公三等公和碩圖爲勇勤公一等公揚古利爲英誠公○命揀選入旗家人二千以伊禮布爲副將軍統之赴西路軍營備用○壬辰以鄂爾

奇爲左都御史仍兼理工部侍郎事○是月免直隸霸蔚二州故城清河交河西甯四縣江南建平縣黑龍江墨爾根城等處官莊雍正八年被災額賦有差

夏四月癸巳朔河東總督田文鏡因病乞休得旨田文鏡著暫行來京調理伊常服按察使陳世倌方劑亦著隨其來京河東總督之銜原爲田文鏡而設今仍以巡撫銜著浙江布政使張元懷署理該部將前河南巡撫關防查出送往交與張元懷其河東總督關防仍畱豫省俟田文鏡病痊回任之日照舊管理○以孫國璽署浙江布政使

由大理寺少卿遷

唐繼祖署河南按察使

由鴻臚寺卿署

○甲午

召魏廷珍來京以王士俊爲湖北巡撫調楊永斌爲廣東布政使以張璨爲湖南布政使胡瀛爲湖南按察使

由直隸清河道遷

○乙未諭

內閣朕因直隸州縣之被水不過近河村莊其他高阜之處收成

豐稔彼此可以相資不至艱於謀食是以未頒加賑之旨今聞畿南州縣之中有被水輕重之不同其被水輕者民間可以支持而被水稍重者卽有日食不敷之慮卽大名府屬之長垣東明開州等處皆地勢窪下之區失業之民甚覺艱窘恐其他州縣亦有與之相類者今去麥熟之時尙有月餘應籌接濟之道以資其耕作若從京師遣官分查必致稽遲時日副都統趙宏濟係上年散賑之員著馳驛前往保定會同該督唐執玉布政使王蕃等查閱上年散賑檔案將其中被水稍重應行加賑之州縣一一確查明白遴選賢員星速分途前往會同該地方官或動倉穀或動帑銀覈實散賑至麥熟之時停止儻奉行不力或有遺漏浮冒等弊經朕訪聞定將大小官員從重議處○戊戌裁廣東澄海縣東壟河泊所大使改設樟林鎮巡檢一〇己亥吏部兵部議准廣東總督郝

玉麟奏改設縣治事宜一裁海豐縣之甲子捷勝二所改置一縣於東海濬立縣治設知縣一典史一移海豐縣訓導爲新縣訓導改原駐東海濬千總爲新縣城守營千總一海豐縣屬地方有附近東海濬之坊廓石帆吉康等三都並大安陳牙雲落礫峯橫隴石陂黃塘賴僧朋塘上護赤花廊公半逕新田螺溪上下沙等十六屯請撥歸新縣管理一舊設東海濬巡檢應改爲甲子巡檢移駐甲子城與河田巡檢俱隸新縣管轄其汕尾巡檢改爲新縣黃沙坑巡檢一海豐長樂興甯龍川永安五縣與新縣捕務應歸駐紮碣石之軍民同知管理一請裁平海大城海安大鵬雙魚五所改設平海所巡檢一該所原管軍屯錢糧歸併歸善縣管理大城海安二所軍屯糧米歸併饒平徐聞二縣管理並請添設新安陽江二縣縣丞各一駐紮大鵬雙魚二所城一請裁陽江縣太平驛

陽春縣樂安驛驛丞二缺其驛務歸各該縣管理於太平地方添設巡檢一以司捕務從之尋定東海濬新設縣曰陸豐○復設廣西鬱林州州判一添設鬱林州撫康巡檢柳州府懷遠縣梅寨巡檢各一○庚子諭內閣朕御極以來繼述皇考聖祖仁皇帝又安區宇之聖心旰食宵衣朝乾夕惕欲使薄海內外休養生息物阜民安永戢兵戈咸登衽席以成蕩平熙皞之治是以宣猷敷治之閒宏綱庶務凡有益於民生者莫不興舉不便於民生者莫不屏除若有幾微措置失宜卽五內展轉寤寐難安豈肯好大喜功興兵構難使百姓有供應之勞不遑甯處哉惟是鋤暴乃所以安民撫內必兼乎攘外此古今不易之至理帝王治世之常經凡爾百姓麤通大義者卽莫不知之不必待高遠之識也惟彼準噶爾一部落原係元朝之臣僕其始祖曰額森額森之子托渾漸至

大員因擾亂元之宗族離開蒙古惟恐獲罪遂背負元朝之恩逃遁藏匿於西北邊遠之地煽惑匪類要結黨與自稱準噶爾當我朝定鼎之初各處蒙古傾心歸順求爲屬國獨準噶爾一部落違越於德化之外至噶爾丹策妄阿喇布坦二人則尤狡獪兇頑之甚者噶爾丹身爲喇嘛不守清規不遵佛教破戒還俗娶青海鄂齊兒圖車臣汗之女爲妻又潛往青海地方賊害伊之妻父而擄其人眾又復巧構釁隙乘喀爾喀之不備發兵猝擊以致喀爾喀人眾潰散紛紛投我天朝蒙 聖祖仁皇帝施恩撫恤遣使前往噶爾丹處諭令戢兵和好多方開導乃噶爾丹冥頑不靈轉借追襲喀爾喀之名犯我邊汛彼時卽行勦滅復有何難我 聖祖仁皇帝至仁如天好生爲德特遣官員前往責問是時噶爾丹惶愧恐懼設誓撤兵仍復潛住近邊暗圖窺伺且乘閒搶掠蒙古牲畜

俾其不獲安居我 聖祖仁皇帝始親統六師躬行天討噶爾丹逆天背理自速滅亡此噶爾丹之始末也策妄阿喇布坦者乃噶爾丹之姪也彼時旣平噶爾丹卽可鋤絕根株不畱餘孽祇因我 聖祖仁皇帝寬大仁慈赦罪宥過且念策妄阿喇布坦素與伊叔不相和睦情有可原於是加以天高地厚之恩將噶爾丹餘賸部落賞伊收管此時伊力弱勢微甚爲恭順其後則離間伊妻之父子誘其妻弟攜帶萬餘戶至伊住牧之地因而強占入己由是勢力漸增竟敢肆意妄行窺伺青海侵犯哈密又潛兵入藏殺害伊妻弟拉藏汗毀壞寺廟荼毒人民我 聖祖仁皇帝特遣大臣前往詢問乃伊啓不畏死阻兵抗命因使臣率師甚少兵力單弱伊得肆其猖狂此實天下臣民所共憤者我 聖祖仁皇帝仍賜包容諭令兩路官兵姑緩前進以俟其悔過輸誠若怙終不悛則

命將徂征犁庭掃漠此我 皇考之本意也朕卽位以來伊雖遣使求和而詐僞作奸仍復如故且將我青海叛臣羅卜藏丹津收畱藏匿朕屢次降旨諭以定界息兵而伊狡飾枝梧巧幻百出及策妄阿喇布坦身故伊子噶爾丹策零繼立其妄亂之性狂悖之行更過於其父其遣使陳奏之詞甚屬支離妄誕卽如前年西藏阿爾布巴等之戕害康濟鼐亦因與準噶爾地方相近而逃匿之羅卜藏丹津又係伊等姻戚彼此相依是以敢於悖逆朝命而仗準噶爾以爲狡兔之三窟也似此世濟其惡之人以逞兇挾詐爲心以刦物傷人爲事不可以德感不可以理諭無賴無恥懷逆藏姦時時欲戕害臣服我朝之蒙古部落以壞我屏垣若當此可以經理之會而瞻顧因循避興師動眾之名爲耽逸偷安之計將狡寇一日不滅則蒙古一日不安邊境一日不甯內地之民一日不

得休息而首先疲於奔命者卽三秦之黎庶也卽以上年之事論之賊夷先遣使臣僞稱請和及朕降旨停兵以待信息而彼於深冬冰雪之時傾其醜類乘我不備侵犯汛界盜竊駝馬然則此等狡寇固可置之度外聽其貽害於將來乎從來窮兵黷武爲聖帝明王之所深戒而以大加小以強陵弱又仁人君子之所不忍爲者况準噶爾彈丸之地遠在極北之區得其地不足以耕耘得其民不足以驅使卽使滅此朝食亦不足以誇廟略而耀武功此皆皇考與朕熟思審處先後籌畫數十年而出於萬不得已者也惟是地方有軍旅之事厲兵秣馬諸務紛繁雖不取辦於民財恐不免借資於民力向蒙 皇考軫念秦民勞勩所以加恩優恤之者無待朕之縷述矣朕御極之元年卽將陝甘二省康熙六十年以前民屯衛所未完銀米豆草等項悉行蠲免又將舊例應完之

三釐三合免其徵收數年以來西安所屬額徵錢糧或免四十萬或免八十萬甘肅所屬錢糧則連歲全行豁免他如展納課之定期寬帶徵之舊欠開墾地畝修築河渠悉動帑金永爲民利此皆朕之加惠於秦民者可約略舉之也卽以西陲用兵之事言之北路軍需交與怡賢親王等辦理西路軍需交與大將軍岳鍾琪辦理皆定議於雍正四年者王大臣等密奉指示一絲一粟皆用公帑製備纖毫不取給於民間是以經理數年而內外臣民並不知國家將有用兵之舉及至雍正七年大軍將發飛芻輓粟始有動用民力之時朕皆敕令地方有司照數給與腳價嚴禁剋扣短發侵蝕等弊儻有不肖官員借稱軍需科派擾民者著該管大臣卽行題參革職先動帑金傳集百姓如數給還朕所以爲百姓防患除弊者亦極嚴切矣上年該督撫先後奏稱民人中有願捐草束

以供牧養者紳衿士庶中有願捐車輛以資輓運者朕皆獎以溫諭仍令照數給與價值去冬賊夷猖獗之後將來軍餉較前未免繁多又特加派運價一切軍務悉令有司寬裕辦理朕豈肯因戎事緊急稍涉權宜使閭閻騷擾於萬一哉意謂三秦眾庶必能諒朕不得已而用兵之苦心悉朕不忍累民之至意矣乃近年風聞陝西之民竟有怨朕而私相謗議者總因十數年來陝西居住之允禩塞思黑年羹堯延信等皆懷挾異志包藏禍心其脅從之黨實繁有徒如塞思黑之令狐士儀年羹堯之鄒魯淨一道人延信之道姑王氏等皆公然以反叛爲眾人之倡則其他匪類之造作妖言暗中煽動者又不知其幾矣地方既有奸回之人而又值軍興旁午或有司自顧考成間有奉行不善之處是以愚民無知惑於邪說溺於私情偶因用力於目前遂忘受恩於平日此亦事勢

之所不免者夫秦風樸直自古爲然樸則易被人欺直則善言易入止以向來未有宣諭化導之人而該省督撫以及有司既有刑名錢穀之專責又有徵兵籌餉之軍需簿書執掌難於兼顧是以準噶爾之始末邊防關繫之情形 皇考與朕奉天討罪除暴安民萬不得已之苦衷並未家諭戶曉但聽僉邪小人搖唇鼓舌誣謗朝政變亂是非無怪乎草野之中被其迷惑者不少也今朕特頒此旨遣左都御史史貽直侍郎杭奕祿署內務府總管鄭禪寶率領翰林院庶吉士及六部學習人員國子監肄業之選拔貢生等前往陝甘二省開導訓諭覺悟愚蒙儻合省民人等果能篤尊君親上之義消亢戾怨懟之情將見和氣致祥必邀上天默佑迅奏膚功邊塞永甯烽煙屏息不但爾等安居樂業俯仰優游卽爾等世世子孫共享昇平之樂矣至於軍需各項悉動帑金差員辦

理不得扣剋短少貽累小民所降諭旨至再至三著欽差大臣悉心訪察儻有不遵諭旨卽行題參或所定官價有不敷用之處亦卽據實奏聞若兵馬經過之地有不遵紀律騷擾民間者小過卽告知該管大臣懲治大過卽行參奏不得姑容務使兵民和洽內外輯甯以迓天庥以副朕念○甲辰移廣西慶遠府同知駐宜山縣之德勝鎮添設宜山縣龍門司巡檢一○乙巳何國宗緣事革職以趙殿最爲工部右侍郎由內閣學士遷○禮部議覆御史湯俠奏凡遇大祀中祀嗣後請令六科散給事中各道監察御史照郎中例一體敬謹陪祀永爲定例從之○甲寅改陝西西安府永豐倉大使爲西安糧道永慶倉大使○乙卯予故禮部尙書常壽祭葬○丙辰廣東巡撫鄂彌達奏瓊山儋州歸化等州縣生黎四百八十丁內附○戊午諭內閣聞天津一帶民間漁船專以販魚爲業每

年穀雨以後芒種以前是其捕取之時亦猶三農之望秋成也若此時稍有耽誤則有妨一年之生計矣目今天津運往山東積貯米糧皆雇覓漁船裝載然亦當聽小民之情願勿以濟山東百姓之儲而妨直隸民生之計著直隸總督天津總兵官速飭辦理糧務人員就近酌量此時不可強雇漁舟致令失業此係積貯備用之米石俟過芒種以後運送亦未爲遲其速將朕諭徧行傳知

五月甲子諭大學士等鎮安將軍常賚著領兵前往安西駐紮石雲倬著授爲西路副將軍前往軍營○辛未諭內閣用兵以籌餉爲先而挽運以得人爲要果得其人則民力不致煩勞國帑不敢糜費而兵食饒裕士飽馬騰其裨益於公事良非淺鮮也年來西北兩路用兵籌餉事宜朕心實費區畫北路軍糧范毓黻承領運送諸事諳練措置得宜朕深嘉獎已加優敘西路軍糧向來俱係

官運今行之日久難保無侵帑累民之處因思通政使趙之垣副將馬龍乃三秦世族且官至大員於本地土俗民情素所熟習若照范毓麟之例領取帑銀轉輸挽運似屬可行之事朕將此詢問趙之垣據稱情願效力查內地軍糧應送巴爾庫爾軍營者年來經理已有頭緒但自軍營進勦之糧尙無轉運之善策著趙之垣前赴軍營與馬龍公同商酌如何運送之法聽其自行定議酌量舉行每石運價若干朕悉照數給與不令絲毫賠墊但不可有浮冒侵蝕之弊總與地方有司毫無干涉其閒遲速機宜及道途防護等情則與大將軍該督撫等計議而行俟趙之垣到彼與馬龍商酌定議果能承領辦理具奏到日給與欽差關防○癸酉雲貴廣西總督鄂爾泰奏烏蒙逆賊悖亂將士忠勇忘身不三旬而復郡治不七旬而收全土今渠魁就擒並無漏網雲貴土兵已經全

撤得旨烏蒙改設府治之初諸事尙未就緒又值劉起元不善撫
馭激成事端逆黨勾連幾有猝難收拾之勢而將弁軍士奮勇爭
先旬月之間消平寇亂此皆總督鄂爾泰平時節制封疆以公忠
表率官僚以義勇訓練將士而臨機應敵又復調度有方用能迅
奏膚功永安苗境論功行賞當以鄂爾泰爲先但念該督自聞賊
變以來時時以先事疏防引過自責今軍事告竣不肯自居蕩寇
之功屢次陳奏情詞懇切朕從其所請以成其謙抑之素志若以
功過而論則一時疏略之微瑕豈能掩其多年教養之善績耶特
將朕意宣諭中外共知之所有陣亡帶傷及奮勇官員著該督查
明送部從優議敘賞卹○乙亥諭大學士等從前三月間賊眾有
二千餘人來吐魯番見我兵前往應援賊兵卽先行潛遁今據大
將軍岳鍾琪奏報四月間又有賊千餘來擾吐魯番並有二百餘

人犯我陶賴卡倫等語朕看此情形或者將來賊人由哈喇沙爾潛往噶斯地方又如上年故智暗行騷擾或增添人眾窺伺青海亦未可定格默爾等所統兵力未免稍單朕前次曾有不應調撥西甯兵丁之旨若此時有應用添兵之處恐格默爾等亦不敢調取德成亦不敢派撥可傳諭德成達爾瑪允中管承澤格默爾爾滿岱福甯等從前可以不令調撥兵丁者蓋西甯軍務尚未就緒自以固守根本爲是今西甯布置已定兵力有餘若賊人窺伺噶斯自應發兵應援況目前青海蒙古兵丁尚未攢集齊全卽器械等件亦未周備難以望其捍禦賊鋒亦賴官兵爲之保護著德成等就近酌量儻有用兵之處或著管承澤爾滿岱帶領前往或德成另議一二人前往至官兵派出之後遇有本地添兵防守之處卽將土兵派出此旨著德成並諭眾佛保殷扎納知之○癸未諭

內閣朕視天下兵丁皆爲一體莫不冀其生計有賴俯仰從容然
養育於平時者自有經常畫一之道而加恩於格外者則不得不
由近及遠次第舉行如恩賞兵丁生息銀兩一事首先於在京之
八旗次則推廣於各省駐防及督撫提督標下又次推廣於各省
鎮標皆令將軍副都統督撫提鎮大臣會同經理以爲長久之計
數年來固有料理得宜可濟兵丁之緩急者而措置未協啓人議
論者亦往往有之則此事經畫之難可知矣至於各省協標兵丁
雖同列行伍而駐紮分防之處與督撫提鎮相隔遙遠若偶遇緩
急必須文移來往多延時日始得領此數金豈能濟其一時之用
若照例給發則見今督撫提鎮大臣辦理此事尙覺繁難未能妥
貼副將以下等官豈可交辦此事恐徒貽累於弁員而無裨於兵
丁實用也近聞各省協標兵丁有謂督撫提鎮等不爲代請而生

怨望之心者不知國家之恩施並無偏向戎行之沐澤自有後先將來西陲軍務告竣國用充饒朕自徐思周徧加恩之策若伊等不察事勢此時俱欲均沾妄生冀倖是因朕逾格之恩而啓非分之望則朕惟有將見行之恩賞悉令撤回然後可以畫一豈不因數人之無知而阻眾人受恩之路乎思之思之○丁亥廣西巡撫金鉉奏敎職一官無可展施縱有才能莫由顯著請於廣西敎職內擇其年力强壯應對明白才品可觀之員咨送督臣分派雲南貴州兩省俟遇有州縣及佐貳等缺酌量試用題補並請通行各省一體遵行得旨訓士理民俱關緊要封疆學政各有專司定例彼此不得干預若將敎官之優者悉改膺民社之寄是以理民爲重而以訓士爲輕凡畱司鐸之任皆有司所棄而不取之人勢必使天下敎官莫不希冀升遷日萌鑽營倖進之念孰肯專心訓課

爲國家教養人才乎况督撫不可干預學臣之事亦如學臣不得干預督撫之事也金鉉所奏豈非欲兼攬學政之權且沾教官之稱譽乎卽據稱教職一官無可展施其才能莫由顯著旣如此則又如何知其可辦吏事而選用乎若以語言應對之閒定人品之優劣分才具之短長恐鑑衡之失實者不少矣至於教官之賢者督撫原可隨時保舉而大計之年又可列爲卓異並非不得與於薦揚之選者金鉉實屬冒昧著將原本擲還○戊子雲貴廣西總督鄂爾泰奏廣西思明土府所屬之鄧橫寨强暴恣橫積惡少年通計一百九十餘戶丁壯千人而兇徒聚處專事劫殺左有雷蓬右有邨練暗結黨羽密竹層柵結爲外衛深壕險坎設爲內坑槍箭能出不能入兵役敢進不敢前黔苗滇獍之中從無此兇悍者從前提臣張浦以爲必不可縱而所委副將尙清昧於形勢輕率

進勦致損軍威臣令鎮臣蔡成貴自二月十四日抵軍營搶築礮臺紮營駐守示以圍困之意一面督兵漸偏賊巢剋期攻入三月初四日據報我軍分中左右三路攻賊之四六九三甲占據其要隘焚毀其寨柵殺死賊兵無數生擒一百餘賊悉行正法尙餘男婦六百餘名解送省城聽候發落賊眾全平報聞

六月甲午諭大學士等甯遠大將軍岳鍾琪摺奏準噶爾賊眾二千餘人圍困魯谷慶之城晝夜攻打二十餘日吐魯番回子奮勇出擊殺死逆賊二百餘人帶傷之賊甚多請以三千勁兵兼程而進必獲全勝將來卽以此三千兵丁駐紮吐魯番合之回民足備防禦等語前次聞吐魯番回民等感恩望濟之言甚爲懇切恐賊眾再以大力侵陵伊等不能抵敵爲其所困已降旨令大將軍岳鍾琪酌量發兵應援不必拘執前說今岳鍾琪具奏之日尙未接

到朕旨是以仍作遊移之詞凡應兵之道在於隨機應變不容刻
緩若果岳鍾琪確有所見卽應遣兵速往一面奏聞何必待降旨
到日始遣兵前往乎又奏稱挑選精兵三千名駐紮吐魯番外餘
贍壯健兵丁畱駐新城防守儘足備進擊烏魯木齊之數等語朕
思我兵進擊烏魯木齊之時若有賊眾繞道侵犯新城當思應援
勦殺豈可但作防守之計至於此時應援吐魯番自屬應行之事
但噶爾丹策零性情躁妄此次失利之後或於冬季多添兵力攻
擾吐魯番未知我三千兵丁合之回子之力便可以從容捍禦否
且我軍駐紮吐魯番則將來不得不時爲應援岳鍾琪從前曾有
吐魯番駐兵數萬之奏若此時駐兵三千將來因此牽制有不得
不加增之勢此則舍本逐末必不可行者也朕思吐魯番乃阿爾
灰哈喇沙爾兩路之關鍵既有軍駐紮則將來築城於烏魯木齊

時呼吸相應賊人不敢繞襲我軍之後况我軍正欲進攻賊之巢穴若賊人果以大眾來犯吐魯番則我軍不勞遠行可以就近殄滅之亦是善策總在岳鍾琪悉心籌畫務期萬全若將大營兵丁三千名派往吐魯番則此三千之數當另行撥派以足額吐魯番地方難於多養馬匹况此三千兵丁乃爲防守之用非爲追擊之用所帶馬匹可酌量存留其餘仍遣回大營牧放至於礮火鉛彈多帶備用上年官買吐魯番糧石不必運送軍營卽著留貯吐魯番以備火兵之用吐魯番回目額敏和卓等誠心向化盡力擊賊甚屬可嘉著大將軍傳旨獎勞酌量賞給段匹銀兩茶葉等項彼地既遭賊人侵害恐收成歉薄糧食不敷著卽以官買糧石酌量賞給務使回民得所將此詳悉傳諭大將軍岳鍾琪知之○乙未移廣東廣州府通判駐新城南海縣縣丞駐十三行○丙申封故

愉郡王允禩子弘慶爲愉郡王○丁酉陳福壽緣事降調以對琳

爲盛京工部侍郎

由內閣學士遷

○戊戌諭宗人府朕叔恭親王常甯昔

年受皇考友愛深恩不知感激報效而因循怠惰悠忽終身此

中外所共知者恭親王身後皇考因滿都護賦性庸愚不便將

伊承襲以其弟海善襲封貝勒令在內廷行走敎誨施恩望其成

立以繼恭親王之後乃伊性情暴戾行止乖張口出逆言心無倫

理種種罪惡不可殫述嗣因步軍統領託合齊案內款蹟敗露革

去貝勒禁錮在家未幾仍蒙皇考寬宥慈恩將伊釋放遣往軍

前效力贖罪乃伊仍不悛改輒敢違旨私回若論軍法憲章均無

可赦朕念其爲恭親王後裔委曲全其性命仍行拘禁此海善之

大概也從前海善獲罪之後無應襲之人皇考不得已而仍用

滿都護且加以厚恩畀以寵榮要職無非欲其努力向上改過自

新以延恭親王之一脈乃伊下愚不移轉入於阿其那塞思黑蘇
努保泰等之邪黨私相固結而不思 皇考高厚之鴻慈其顛倒
妄亂至於如此及朕卽位以來又復加恩任用指示開導以動其
天良冀收後效而伊顧戀匪黨狡獪百端搖惑人心阻撓國政且
鑽營詐僞行止卑污其獲罪被參之案不可枚舉朕悉行寬宥而
保全之此滿都護之大概也滿都護之弟對青額庸劣不堪罔知
愧恥昔在侍衛班聯曾因飲酒沈醉竟溺於中和殿階級之上此
眾人所共知者海善之子倫木布昔蒙 皇考深加恩養令在乾
清門侍衛班中行走訓誨矜全冀其上進乃 皇考升遐之日萬
國臣民如喪考妣而倫木布面無悲戚之容目無涓滴之淚朕以
此知其未具人心矣是以降旨將伊與伊父海善一同拘禁今已
病故此對青額倫木布二人之大概也朕叔恭親王之子孫大抵

如此假使稍有可望成立之人則滿都護屢獲重罪之後朕即可選擇而用之矣止因不得其人是以前滿都護姑容曲宥以至於今今滿都護病故無子見無可承襲者朕念吾叔後嗣凋零再四思維或擇一人襲封貝勒或賜襲郡王以繼其後然而得其人則可以繼續先緒不得其人則必至廢墜家聲且一時勉強襲封而不克承受將來獲罪被譴難以保全非所以成就之也海善等即前車之鑒著宗人府會同議政大臣八旗都統滿洲尙書侍郎秉公詳慎於恭親王子孫內選擇可以襲封之人公同舉出奏聞請旨若果不得其人朕意欲照 皇考時以朕弟瀋郡王過繼純親王之例於朕幼弟中選擇一人封爲郡王以繼恭親王之後如此朕叔之王爵可以長久縣延而伊之親子孫各守祿位易於稱職永遠同受國家之恩澤似爲有益亦著會同悉心定議具奏○庚

子甯遠大將軍岳鍾琪奏賊夷圍困吐魯番臣挑選馬步三千名令張元佐曹勣張存孝統領於四月二十四日進發又令顏清如帶兵二千名前赴塔庫駐紮又備兵四千名令紀成斌統領前赴陶賴要隘駐紮儻賊人傾眾前來臣卽親身統領陶賴及塔庫二處駐紮之兵兼程前往勦戮惟是回民若令此時遷移途中行走不能便捷三千護禦兵丁首尾亦不能相顧擬將應援三千馬兵內暫畱一千名駐紮吐魯番以爲抵禦防範其餘二千名馬兵令其回營如蒙准臣前奏安設三千兵駐紮吐魯番臣卽將駐紮塔庫之步兵二千名令其前往補數俟我軍進擊烏魯木齊之時再令回民遷移內地卽將此一千兵丁護送可無劫奪之患得旨應援吐魯番之舉朕早已降旨此奏尙有計算未到之處今年秋閒襲擊是第一善策至於應援吐魯番乃相機不得已之舉耳若但

加意籌畫於應援之師而不計及於襲擊之舉是舍本而逐末也
且發應援兵丁三千名之外又令顏清如領兵二千名駐紮塔庫
紀成斌領兵四千名駐紮陶賴是已派兵九千與前請旨駐兵三
千於吐魯番之奏大不符合矣今年原議挑選精兵一萬二千名
進擊烏魯木齊不知此所派應援吐魯番之九千兵在此一萬二
千名兵丁之外乎亦卽在其內乎此兵平定吐魯番回營人馬尙
可進擊乎况前奏設三大卡倫於要隘之處安兵三千名此非大
營之精兵乎今稱存營兵丁尙有萬餘足以防禦假若賊人旣擾
吐魯番使我兵前往應援大眾侵犯軍營或再如上年之故智擾
過大營驚擾塔爾沁及圖呼魯克等處不識尙可剿殺耶或但
能防禦新築城池也奏摺中總未言及甚屬疏漏至於吐魯番一
部落乃向來甚費商議置之度外者卽上年遣發弁兵駝隻往彼

搬運米糧亦俱未經奏聞致生賊人窺伺之心屢次侵擾此乃從前辦理錯誤以致目今有不得不應援之勢今大將軍親在軍營若確見速應救援便當遣兵迅往何必遲回審顧且前次奏稱畱兵三千名便可防護吐魯番萬無一失今又將吐魯番應否畱兵及回民應否遷移何時動身之處請旨定奪前後全不符合顯有推諉之意朕在數千里之外豈能洞悉地方情形臨事機宜豫先一一計算指示乎殊失朕信任倚賴之初心矣儻見此諭旨以爲吐魯番不應內移勉強順合朕意輕率舉行則尤其不可○壬寅諭內閣今年仲夏以來京師雨澤愆期目前甚覺亢旱朕於宮中齋心虔禱尙未仰蒙天降甘霖展轉思維從來上天之錫福降災悉由於人心感召尙書曰作善降之百祥作不善降之百殃古人又曰福之至也人自生之禍之至也人自成之蓋上天慈愛爲心

斷無降災於人之理其遭值水旱饑饉者皆由天下人之自取所
當恐懼修省以懍天戒若因此而或生怨尤之心則其獲罪更大
而爲無忌憚之小人矣朕深明此理時刻自儆切切冀望天下臣
民共修趨吉避凶之道以承受上天之恩數年以來諭之詳矣今
茲亢旱之象或由於朝廷政事之有闕或由於臣工職業之不修
或由於士民心術之不慎有一於此皆足以干天和而致祲沴儻
有無知小人不察人事感召之故不知上天垂象之意狂肆冥頑
敢生怨懟則乖戾之氣自外生成上天雖欲寬宥而不得矣朕兢
兢戒懼夙夜靡甯再四推求欲得致旱之由急行改易凡屬臣工
均當撫躬自思何處不能稱職何事應當獲譴一一省察而悛改
之至爲士爲民者雖無治人理事之權而舉念之純疵居心之善
惡天高聽卑實垂昭鑒苟無自作之孽必不遭難追之條總在吾

君臣士庶各自捫心省愆思過勿推於他人而存自恕之念勿諉諸氣數而忘儆惕之心則和氣致祥時雨甘霖必仰邀上天之恩賜勉之勉之著將此旨通行曉諭在京官弁兵民人等咸使知悉其近京省分若有缺雨之處著一體宣示○諭賭博之事敗壞品行蕩費家貲其爲害於人心風俗者不可悉數欲杜此惡習則賭具之禁自不可以不嚴朕爲拳拳訓飭至再至三凡地方大吏有司有教養斯民之責者皆當仰體朕心奉行唯謹不當視爲具文也京師戶口繁多五方雜處年來稽查嚴密不肖之徒頗知斂跡至於外省之稽查較京師爲易而督撫以至守令奉行不力聞省會之地有公然製造賭具列諸市肆而不知畏懼者百姓之藐法如此則大小官吏能辭溺職之罪乎步軍統領衙門屢次拏獲私賣賭具之人供稱販自外省地方則外省之疏忽廢弛顯有證據

矣賭博難禁而造賣賭具之禁尙屬易行之事前年定例凡失察
造賣賭具之知縣照溺職例革職知府革職畱任督撫司道等官
各降一級畱任著該部將朕此旨再行宣諭儻嗣後有犯者必照
定例處分不稍寬貸○癸卯以京師亢旱命清理刑獄○添設貴
州安順府同知一駐郎岱○丙午靖邊大將軍傅爾丹奏臣等於
五月初六日至科布多築城地方隨據烏蘇圖舒魯克卡倫駐防
之侍衛巴爾善等拏獲準噶爾賊夷塔蘇爾海丹巴一名供稱噶
爾丹策零派兵三萬令大策零敦多卜小策零敦多卜及大策零
敦多卜之子多爾濟丹巴三人統領陸續起程至阿爾泰山奇林
地方會合來犯北路今小策零敦多卜已至察罕哈達地方大策
零敦多卜與伊子多爾濟丹巴尙未到齊見在之兵止有二萬餘
名噶爾丹策零恐哈薩克國聞知乘虛來攻豫先派兵一萬合大

策零敦多卜之子納木扎爾達錫衛徵和碩齊總領駐防阿爾輝地方又派兵一萬令諾顏和碩齊總領駐防阿里馬圖西拉百爾地方噶爾丹策零遊牧處兵丁不過二萬名保守又供噶爾丹策零前令其妹夫羅卜藏策零帶兵一萬名往阿里馬圖西拉百爾駐紮防哈薩克國羅卜藏策零因與噶爾丹策零不和率領其屬下三千餘戶來到大國噶爾斯地方噶爾丹策零聞知派吳喇忒巴噶滿朱追逐交戰被敗復遣喀喇沁杜噶爾之子查袞追逐因此大策零敦多卜遲延未來等語臣思賊人尙未全至乘其不備正宜速迎掩殺臣等揀選京城各省兵一萬名輕裝由科布多河西路於六月初九日起程分爲三隊前鋒統領丁壽散秩大臣公達福副都統塔爾岱率領第一隊參贊馬爾薩副都統承保西彌賴率領第二隊臣等統領大兵前進沿途襲擊其科布多築城地方

畱兵七千三百名仍舊築城防守糧餉令都統袞泰總兵胡傑等
管轄科布多河東係通奇林要路派定滿洲兵二千名俟都統侯
陳泰副都統阿三到時駐紮管轄與袞泰等互爲應援所有統兵
起程日期理合具奏報聞○丁未傅爾丹奏臣等於初九日分隊
起程之後遣前鋒統領丁壽參贊馬爾薩副都統塔爾岱等統兵
率嚮導官前行瞭望賊勢在扎克賽河地方擒獲準噶爾賊夷巴
爾喀等十二名據供小策零敦多卜牧場在察罕哈達地方離臣
等軍營止三日程途僅有兵一千名尙未立營防守大策零敦多
卜因途中有病畱駐和博克山其子多爾濟丹巴已於小策零敦
多卜山梁前駐紮羅卜藏策零與噶爾丹策零不和率領其屬大
約不往圖爾古特卽往青海等語臣等乘夜進兵襲擊察罕哈達
賊人奏入報聞○副都統格默爾奏騰格里卡倫扎薩克諾爾布

於五月二十八日背叛擾亂臺站劫掠馬匹旋即逃至滾額爾吉庫庫烏蘇游牧之處臣卽令扎薩克恭格台吉阿拉布濟等領兵追逐又領巴顏等追至喀喇果爾地方見恭格等已將諾爾布圍困復又脫逃巴顏等追緝至蒙古爾托羅海地方擒獲諾爾布並其佐領里塔爾與恭格等押解回營其效力之扎薩克台吉弁兵等查明具奏報聞○戊申副都統達爾奏青海原扎薩克墨爾根戴青拉查卜等悖逆逃遁渡梭羅木河而去臣等率兵追至河濱先將其子察罕拉布坦生擒隨整兵往擊拉查卜營寨拉查卜畏威迎降跪叩投誠臣等率領由梭羅木河大路回至青海游牧處其效力之台吉弁兵等查明具奏得旨從前親王戴青和碩齊察罕丹津一聞伊姪拉查卜逃走卽將拉查卜部下人等收回察罕丹津歷年效力行走今已老病仍感恩效力甚屬可嘉著賜大段

二十匹再發銀一千兩令其酌量賞伊部下效力人等拉查卜雖係伊兄之子朕知其素不相睦至拉查卜之子察罕拉布坦能知伊父之罪不肯同逃殊屬可憫拉查卜甚屬庸愚雖無故逃遁見我兵追趕即便迎降罪尚可恕著將伊送至京師候將伊逃遁之故問明將伊交察罕丹津之處另降諭旨其拉查卜公爵朕尙欲令其子察罕拉布坦襲替並曉諭知之○改廣東陽山縣星子朱岡巡檢二員歸連州轄○己酉諭刑部凡竊賊滿貫者定例擬絞監候此等賊犯論其情罪無可矜原而每年秋審之時按律又不至於處決是以往往監禁多年不行結案卽該犯有悔過改惡之心亦無自新之路著刑部將各省此等賊犯已經三年者一一查出酌其情罪或應釋放或應減等發落並日後再有過犯如何從重治罪之處一併定議具奏○庚戌諭刑部在京監禁人犯其情

罪尙輕按律不至於擬決者已令該部該旗查明暫行釋放俟處暑後再行酌量寬減歸結其外省輕罪人犯亦應酌量加恩著將已經到部之案其中有問擬徒杖而准其折責者該部查出悉行寬免結案○辛亥甯遠大將軍岳鍾琪奏賊夷圍困魯谷慶四十餘日賴漢回官兵協力固守殺死賊人二百餘名帶傷者甚多賊人見攻魯谷慶城不下遂圍困附近之哈喇火州城堡用木梯三百餘副爲攻城之具回民等用槍擊死賊人三百餘名賊眾一聞大兵應援之信倉皇逃遁遺下馬匹槍刀等件並拋棄所造飯食而去及總兵官張元佐等領兵兼程前進賊眾已遠遁無蹤張元佐等到魯谷慶城下回目額敏和卓及回民老幼男婦出城迎接歡聲震地張元佐等因天氣炎熱馬匹疲乏雖官兵奮勇滅賊不敢窮追今臣將派往之馬兵撥存一千名駐紮魯谷慶其餘兵丁

俱行撤回若賊夷又率二三千人來侵則官兵與回兵可以抵禦
儻傾眾而來臣當親統大軍就近剿殺以免我師遠行若必令回
民遷入內地則俟我軍進擊烏魯木齊之後卽令官兵一千名護
送行走更屬無慮得旨賊夷侵犯吐魯番之舉實由我軍屯運糧
石啓釁以致有不得不應援之勢今官兵遄行往返恐將來似此
無益之舉正多不知大將軍亦曾計及此否此番回民感戴救濟
之恩歡聲大震將來賊夷切齒於吐魯番必思報復以大力侵陵
之態至狼狽流離時不知仍似此感戴乎目今賊夷以三萬眾侵
犯北路見據靖遠大將軍傅爾丹等奏報前岳鍾琪曾有親統大
兵前往吐魯番剿殺而畱紀成斌看守之奏假若賊人此番不向
北路而向西路將賊眾分爲兩大隊以一隊先侵吐魯番及岳鍾
琪領兵應援前往賊人又以大隊侵犯軍營再散其醜類於塔爾

那沁及圖呼魯克等處不知我軍之力尙可從容肆應否今賊夷圍困魯谷慶哈喇火州二城官兵冒暑遠行疲勞士馬未遇一人未戮一賊而岳鍾琪摺奏中有奮勇滅賊之語將以此番之舉遂謂建功樹績於戎行乎賊夷聞風而遁可謂懼我軍威乎卽畱兵駐防與遷移回眾朕意尙無定見大將軍在軍營與遙揣者不同若果確有所見自當因時制宜以身任之總之向後若有應援吐魯番之舉止可委將發兵便賊首親來攻取吐魯番大將軍亦不可統兵親往吐魯番一切事宜岳鍾琪當與伊禮布常賚石雲倬等詳密籌畫作速定議○壬子實授宗室塞爾赫內閣學士○甲寅上以雨澤愆期齋心祈禱並命各部院大臣官員設壇齋戒是日甘霖大沛○乙卯命王國棟往河南趙殿最往山東辦賑緝賊○己未轉王圖炳爲禮部左侍郎以吳襄爲禮部右侍郎

由內閣學

○是月免江南宣城等四縣雍正八年水災額賦有差

東華錄

雍正十九

臣王先謙敬編

臣周澍蕃恭校

秋七月丁卯諭大學士等傳爾丹從前奏稱準噶爾被擒之賊人丹巴曾供噶爾丹策零之妹夫羅卜藏策零帶領所屬三千餘戶來投噶斯一路曾降諭旨與達爾等問明緣由令在有水草之處暫行安置今情形甚屬可疑不可墮其術中著密諭達爾眾佛保德成等令其加謹防範不可妄動○命鄂爾泰來京陛見以高其倬署雲貴廣西總督尹繼善署兩江總督王國棟署江蘇巡撫由刑部署○戊辰諭大學士等陝西西安巡撫武格著來京有交辦事件侍郎馬爾泰署理西安巡撫事務杭奕祿協辦西安軍需其宣諭化導之事交與史貽直鄭禪寶分辦○己巳改江西浮梁永

新龍泉萬安等營守備缺俱爲都司僉書○四川總督黃廷桂奏西鑪口外瞻對等處賊番糾黨搶掠調兵次第勦撫得旨進勦瞻對漢土官兵奮勇力戰直搗巢穴番眾率先輸誠已將賊首擒獻此次出征效力有功之弁兵等著酌量議敘賞賚所有傷亡漢土官兵著照例賞卹○辛未大學士九卿等奏怡賢親王功德光昭中外謳思勿替宜崇報享以慰輿情前直隸總督唐執玉請於天津立祠已蒙俞允今復據各省督撫將軍等據所屬官弁紳士兵民公呈節次題請應准其各建祠宇以申思慕之忱得旨從前降旨內外各省官民有實被吾弟怡賢親王之德澤誠心感激者准建立祠宇以展其追慕之忱今遠近各省紳士軍民合詞懇請雖賢王美善孚於懿好之公異口同聲不謀而合朕思天下至大其傳聞王之令名而未親被王之恩惠者若一體建祠展祀則與朕

之諭旨不符卽王平日謙抑爲懷亦必不歆享也除畿輔之地王
之功德理宜俎豆千秋已降旨俞允建祠外奉天爲祖宗發祥
之所仰蒙福佑篤生賢王爲國家宣猷佐政則俯順官民籲請建
立祠宇於情理爲宜至於兩淮鹽務積弊多年自王總理戶部以
來弊端永杜苛累全除眾商咸沐恩膏萬竈皆成樂土再者江南
戶口殷繁水利最關緊要王念切民生留心諮訪將一切興修事
宜奏聞於朕朕本欲俟直隸工程就緒之後令王前往江南爲萬
民興久遠之計王亦身任不辭後以國政需王贊襄不能卽往旋
據陳時夏之奏王奏請速行朕因命督撫大臣等相度經營因勢
利導今東南數千里河流疏通有灌溉之利而無泛溢之虞者實
王勛始之力也王之功德其顯著於江南者如此准於揚州地方
建立祠宇一所以慰輿情浙江總督李衛前爲戶部司官時朕並

不知其名姓王在朕前極力保薦謂其才品俱優可當大任朕因將李衛屢加擢用至浙江總督浙人深受李衛之益者皆王薦舉之功也准從浙人之請於杭州建立祠宇以申其感戴之誠其餘各省陳請建祠者俱不必行○兵部議准雲貴廣西總督鄂爾泰烏蒙一鎮中左右三營額兵止二千八百名而威甯鎮雄東川三營又止額兵各一千名應援防守均覺不敷請照廣西左右鎮之例置中前左右四營應添設前營遊擊一守備一千總二把總四外委千把六兵一千六百名合原設之兵定爲每營一千一百名鎮雄東川二營請各添守備一把總二兵二百名分爲左右軍威甯營請改設爲威甯協裁參將缺改設副將一添設都司一千總二把總四兵五百名分爲左右兩營再曲尋所屬之尋甸州爲東川烏蒙扼要之區請另置一營添設參將一守備一千總二把總

四分撥督標兵八百名撫標兵二百名移駐尋甸其原防尋甸兵三百名移駐羅平從之○壬申吏部議准山東巡撫岳濬奏東省沂莒二州自改爲直隸州後錢糧倉穀沂州屬兗甯道轄莒州屬登萊青道轄查登萊青道遠駐萊郡去莒州六百餘里兗甯道遠駐濟甯去沂州五百餘里均覺鞭長莫及且兗甯道專司河務今管轄兗州一府沂曹東平三州統計二十七州縣一衛一所殊難兼顧請另設兗莒沂道一員駐紮沂州將兗甯原轄之兗州府屬十四州縣一衛一所並直隸沂州及所屬二縣登萊青道原轄之直隸莒州及所屬三縣統計二十一州縣一衛一所俱歸管轄如此則登萊青道分出莒州一屬無控制遼遠之虞而兗甯道僅轄二州得以專理工程於河防亦大有裨益從之○兵部議准湖南巡撫趙宏恩奏鎮筸鎮所屬四營紅苗地方今分設塘汛請移前

營遊擊一添把總一帶兵二百名駐紮池河移右營守備一帶兵一百名駐紮巖口添千總一帶兵一百名駐紮地良坡添把總一帶兵四十名駐紮鴨保寨再添把總一帶兵三十名駐紮火畧坪其餘小汛二十三處酌量安兵七百五十五名又黔省五汛乃鎮筸至六里必由之路應歸楚省設汛至栗林等寨應歸各營管轄並添兵四百名方足分防其左營汛地廣遠應再撥把總一兵五十名分防勞神寨從之○癸酉靖邊大將軍傅爾丹奏臣等六月初九日進兵十七日擒獲賊夷已陸續奏聞二十日遇賊二萬餘人連日交戰殺賊數千因賊匪踞山拒險難以仰攻移營和通腦兒地方誘賊邀擊賊人益兵尾追圍困軍營索倫察哈爾歸化城土默特喀喇沁兵丁俱乘機潰逃臣等整齊殘兵且戰且走賊人追擊晝夜力戰臣傅爾丹等渡哈爾哈納河於七月初一日已至

科布多修城地方前因索倫等處逃兵妄造譌言都統滾泰等以全軍失利奏聞今因賊人有從科爾多河兩路來犯之信臣見在辦理防守之事其每日交戰情形陣亡之大臣官員查明續奏得旨前據北路都統滾泰等奏報大將軍傅爾丹等領兵進剿爲賊所困全軍失利彼時已傳諭西路大將軍岳鍾琪令其加意防守今據傅爾丹奏稱官兵爲賊誘敵於七月初一日帶領兵馬回至科布多軍營等語是從前北路逃軍所報竟屬子虛不過兵馬有傷損之處大將軍等原無恙也可卽傳諭岳鍾琪知之總之目前進兵之議且不必言而防守之策倍當加意著大將軍等照近日諭旨謹慎辦理○甲戌諭大學士忠達公馬爾賽著授爲撫遠大將軍先於派出京城兵內挑選一千名輕騎前往圖拉等處形勝之地駐紮會同喀爾喀副將軍王丹津多爾濟等辦理喀爾喀遊

牧及一切豫備防守事務副都統達爾濟富昌著同大將軍馬爾賽前去續著侯馬蘭泰副都統胡琳帶兵一千名前去其餘兵四千名俱著豫備停妥俟大將軍調遣再令前往八旗漢軍內派兵四千名著都統李杓祖秉衡帶領前往四子部落後面水草茂盛處駐紮以備調遣其派出右衛及歸化城之兵各一千名俱暫在本地豫備調遣其餘兵丁若有調遣之處馬爾賽會同丹津多爾濟商酌辦理○實授傅泰甯夏將軍以海望爲戶部左侍郎由內務府總管○調張鉞爲廣西按察使張體義爲貴州按察使○增江西瑞昌縣壁陳口巡檢一移都昌縣縣丞駐張家嶺增蔡家嶺汛撥兵防守裁南康府楊林河泊大使○乙亥甯遠大將軍岳鍾琪奏七月初五日據北路都統滾泰等咨稱準噶爾賊夷以全力侵犯北路於博克托嶺相近和通腦兒地方傅爾丹等被其圍困臣思

傅爾丹及從征官兵奮力勦殺自必破圍取勝惟是賊人此番領眾來犯北路者以西路軍營上年遭其騷擾駝馬缺乏難以進擊因有輕視西路之心臣此時統西路精兵襲擊烏魯木齊伊恐我師直搗巢穴自必撤北路之兵回顧伊犁我軍旣挫其鋒卽便旋師休息嚴防汎界是不待交戰而賊夷先已疲勞臣不敢坐失乘虛進擊之機宜今帶領參贊提督紀成斌理藩院侍郎顧魯公衮布都統貝敦總兵官張元佐王緒級等啓行前進其軍營各項事務暫交副將軍石文焯辦理報聞○丙子諭大學士等據順承郡王錫保奏稱喀爾喀遊牧之處俱已安頓妥協兵丁亦漸次到遊牧之界喀爾喀三路副將軍各思效力臣等將禦賊守城之策會同商酌豫備等語觀此順承郡王錫保等辦理防範甚屬有方但須謹慎之中愈加謹慎賊人到科布多修城之處儻不行力戰或

暫時圍繞待我策應之師以施誑誘之計順承郡王喀爾喀副將軍等切勿前往策應致墮賊人術中伊等應防護喀爾喀遊牧並看守察罕叟爾地方此最緊要之事果能固守卽伊等之功矣若賊人久圍科布多不去可俟各路兵丁俱到察罕叟爾之時錫保等於喀爾喀兵丁及防戍蒙古兵丁內挑選二三千名給與馬匹分爲數起晝夜前進或尾賊後乘機將賊人馬駝盡行趕出隨得隨殺賊人性畜日漸虧損自然逃遁矣但須防其知覺來追豫思保全之策毋得鹵莽再我兵果蒙天眷敗退賊眾亦斷不可深入追擊賊人逃遁後凡應行看守之處尤宜嚴加防範若賊眾被兵擒獲或力窮來歸除兇悍必不容赦者之外其餘稍有可原卽從寬宥斷不可因我兵受害之故妄行殘虐以圖洩憤至喀爾喀等見在南遷遊牧兵丁赴察罕叟爾者甚眾所帶糧糗未必敷用且

需火藥鉛彈等物查察罕叟爾所有穀石羊隻等物甚多量我軍
足用存備外著錫保酌量賞給喀爾喀兵丁使之充裕勿存妄費
錢糧難以銷算之見朕斷不因所費過多卽加譴責也將此傳諭
順承郡王錫保知之○副都統達爾侍郎眾佛保奏據逃遁被獲
之貝勒達錫策零供稱年幼多病因諾爾布作亂聞我旗下之墨
爾根阿里克鄂木布等同擾臺站搶掠馬匹心懷恐懼於六月初
八日隨母遷移八十里在遊牧內圖古里克地方居住隨訴知王
益蘇克汪扎爾並遣人擒獲墨爾根等並非敢逃遁遠處等語查
達錫策零之伯父貝勒達顏其父貝子噶爾丹代青諾爾布皆實
心效力其伯父歿後因封達錫策零爲貝子其父歿後 皇上施
恩合兩貝子之爵封達錫策零爲貝勒並兼管扎薩克理應感恩
報效乃無故潛逃甚屬妄行請將達錫策零革去貝勒或降爲貝

子或降爲公爵伏候 聖裁得旨達錫策零年幼無知聽信謠言
畏懼遷移並非有意逃遁且值王盆蘇克汪扎爾追趕卽迎前陳
訴又將伊屬下掠馬之人拏送達錫策零從寬免其革去貝勒○
以阿克敦爲額外內閣學士隨撫遠大將軍印原任吏部左侍郎○庚辰
諭大學士等從前令在科布多地方修城原欲駐兵進剿之意今
宜以保固疆域爲要務賊退之後將科布多駐防兵丁悉行撤回
令於察罕叟爾扎布韓等處駐紮近於喀爾喀之遊牧便彼此易
於策應著行文大將軍傅爾丹順承郡王錫保與喀爾喀副將軍
等定議具奏至科布多兵丁或乘青草卽行撤回或俟阿爾泰嶺
下雪之後徐徐撤回令伊等公同商酌料理○諭青海王貝勒貝
子公台吉等爾等俱係顧實汗之子孫自祖宗以來依附內地邊
疆恪順供職我 聖祖仁皇帝視爾等如子孫撫育六十餘年寵

遇之隆至優極渥且念爾等尊崇黃教是以我朝於達賴喇嘛班禪額爾德尼備極恩眷若準噶爾暗遣賊兵侵犯西地殺害喇嘛毀滅供器實爲黃教之罪人爾等儻違棄先人崇祀之教孤負國家歷沛之恩一家之內興起兵戎以啓賊人僥倖之端雖愚昧之人亦不出此前者羅卜藏丹津聽信流言敢行背叛我朝發兵征剿逃竄在準噶爾處困苦恥辱爾等無不聞知今爾若到彼處路途如許遙遠馬畜必致疲斃彼豈能爲爾等置立產業分予遊牧地方令爾等各統所屬依然保聚乎況準噶爾四面皆成讎敵終歲爭戰不休凡用兵之處必置爾等於前虐使任意豈若各守祖父基業永享太平之爲得乎爾等若不熟計利害聽伊誑誘之詞依附賊人妄思蠢動將來興師問罪必先及爾等彼時卽欲悔禍國法不爾貸也朕所以頻降諭旨反復開導令爾等會集兵丁小

心防守將屬下人早行移入者實冀保全爾等爲進剿之用也爾等各思朕愛護安全之至意詳細曉諭屬下人等合力防範果能遵旨奉行朕自大沛恩膏爾等遊牧妻子既無吞併之憂而中外安居亦永享無窮之福矣○辛巳實授張照內閣學士○以諾爾渾爲兵部額外侍郎由參領遷○甲申李玉鉉患病解任以劉藩長爲福建按察使原任福建臺灣道○靖邊大將軍傅爾丹奏六月十七日擒

獲厄魯特哨探賊夷二十三名供稱博克托嶺有賊兵二千駝馬萬匹遣參贊蘇圖副都統岱豪等率兵三千往剿十八日遣前鋒統領丁壽統兵一千五百名應援與賊戰庫里野圖嶺殺賊四百餘名賊驅駝馬踰嶺敗遁十九日丁壽蘇圖等與臣傅爾丹合兵一處二十日賊兵二萬餘人從高埠衝突大營力戰一日殺賊千餘遣都統塔爾岱馬爾齊率兵二千名奪占西山二十一日因賊

營險要移營至和通腦兒誘賊邀擊遣丁壽蘇圖參贊覺羅海蘭副都統常祿西彌賴領兵據山梁之東塔爾岱馬爾齊屯守西山副都統承保居中策應參贊馬爾薩由東路公達福岱豪在前副都統舒楞額土默特公沙津達賴等在後俱保護行營臣傅爾丹統兵繼進移營時賊人列陣衝突軍營來攻丁壽塔爾岱兩軍丁壽等力戰殺賊千餘忽狂風驟雨冰雹齊至丁壽等爲賊圍困臣傅爾丹遣兵將塔爾岱援出又令承保救援丁壽等因日暮未能解圍二十二日覺羅海蘭衝殺賊隊潰圍而出丁壽蘇圖馬爾齊俱自盡常祿陣亡西彌賴命索倫兵救援丁壽索倫兵俱潰散西彌賴隨亦自盡二十三日賊晝夜犯臣大營力戰殺賊五百餘名土默特公沙津達賴等及察哈爾歸化城土默特喀喇沁兵一時潰散軍營止存滿洲兵四千名二十四日隨印侍郎永國及覺羅

海蘭岱豪俱自盡臣等以餘兵退歸步設方營保護輜重以達爾岱署前鋒統領達福舒楞額殿後承保統右翼馬爾薩統左翼臣傅爾丹與副將軍巴賽查弼納往來巡察副都統德祿捧摺敕印起行賊夷領兵三萬餘四面來侵二十五二十六連日力戰殺賊千餘二十七日殿後公達福陣亡二十八日臣等渡哈爾哈納河賊夷尾追衝突左翼力戰殺賊五百餘名遂登山嶺分兵二隊臣傅爾丹率德祿承保自右下山巴賽查弼納舒楞額自左下山臣傅爾丹於七月初一日至科布多修城地方兵丁陸續至營者共二千餘名臣傅爾丹隨遣弁兵往迎未歸諸將惟塔爾岱於初七日負傷至營巴賽查弼納馬爾薩舒楞額今尙未至臣輕舉妄動以致敗績請將臣等正法用彰國憲奏入得旨此舉損兵敗績雖屬有罪朕覽爾等之竭蹶力戰寬恕其罪痛惻難忍不覺淚下將

朕親東之帶賜與軍營令傅爾丹繫之爾等忿激之下急思報復
恐又妄動賊人雖來不可輕進追擊但能相機堅守卽爾等之功
科布多地方若難固守可回至察罕叟爾駐紮今已授馬爾賽爲
撫遠大將軍領兵前來到時爾等公同商酌料理○乙酉諭內閣
朕以直隸山東河南夏間雨澤愆期特命截漕賑濟旣而三省陸
續奏報得雨朕心稍慰茲聞直隸山東及河南彰德衛輝二府有
窮民因秋成無望豫爲渡河而南以圖就食者蓋因本地歉雨之
時尙未聞截漕查賑之諭旨輒思就食他省若卽令資遣還鄉恐
時屆仲秋耕種之期已過轉致失所著該撫飭令沿河州縣於各
渡口詳詢其所欲往地方有力不能自達者量給路費仍知照該
州縣善爲安插除有親朋可依及已傭工得食者聽其自便其乏
食之民著用截漕米石照例計口賑給有欲回本籍者卽給貲遣

回其不願卽歸者候來春給以貲糧使之回籍俱照例動用存公銀兩造冊送部如各省樂善之家有能存恤周濟者該地方官酌量輕重賞給花紅旗扁最優者詳請題達給以頂帶以示鼓勵設愚民無知因鄰省安插得宜仍復離鄉棄業該地方官務悉心安集剴切曉諭令其勿離故土又聞渡河流民有欲往湖廣者去鄉更遠回籍愈難著該地方官卽於所到地方安插務須規畫盡善毋使一夫失所以副朕勤恤民隱子惠元元之至意○傅爾丹奏臣回至科布多修城處驗看工程遂將逃遁之京城正藍旗副參領官保阿達哈哈番陸格首先造謀潰散訛言惑眾之索倫領催里色奔德爾圖先正軍法至黑龍江佐領巴都馬始雖勸阻索倫後亦夥逃妄報科布多河西守卡倫之侍衛吳林泰擅離汛地至營報信前鋒參領金柱前鋒校黑達色奉丁壽之令報信大營並

不衝隊前進先還築城之處俱請革職效力贖罪土默特公沙津達賴由塔布囊晉封公爵不知圖報臨陣潰逃請飭部議罪駐紮科布多河東之參贊侯陳泰副都統阿三聞臣等軍營圍困之信都統滾泰調取守城並不應援反率領所屬兵二千名並達錫領到察哈爾兵三百名急回扎布韓地方請交部嚴加議罪再歸化城之土默特副都統袞布夸蘭大里查布參領塞楞額皆背恩降賊凡被獲脫歸之人俱見其在策零敦多卜之營請先將其妻子正法至賊兵聞暫駐阿爾泰山嶺地方專候噶爾丹策零之信以決進退謹奏○丙戌諭大學士等原任盛京戶部侍郎傅鼎著調回往軍營效力○諭傅爾丹奏稱歸化城之土默特副都統袞布夸蘭大里查布參領色楞背恩降賊請將其妻子按律正法等語朕思歸化城土默特等世受國恩凡遇用兵之地奮勇效力已歷

多年總未有一背國降賊之人今衮布等不顧辱及祖父累及妻子貽羞於眾土默特縱按律處治罪所應得朕今法外施恩衮布等之妻子從寬免死仍令伊等照舊安居著行文與丹晉將此悉諭土默特弁兵知之○丁亥諭大學士等康親王崇安今於八月二十一起身前往軍前著賞給內庫銀一萬兩其隨往該屬人員照順承郡王出征之例賞給應得馬匹照定例折價交與該王辦理○四川總督黃廷桂等奏川省存貯米穀見止四十二萬石有零請早爲籌畫將常平倉捐例改穀作銀隨時糴買並酌開捐納事例將銀買穀存貯得旨川省乃產米之鄉積貯易於爲力該督撫請開捐納誤矣況改穀折銀又復將銀買米徒滋弊端更屬背謬但通省積穀止四十萬石爲數實少應如何增貯之處著大學士等詳議具奏○戊子諭內閣廣西道通交趾聞該地方有無

知愚民拋棄家業潛往交趾地方開礦更有奸匪之徒潛逃異域以致追緝無蹤者似此違禁妄行漸不可長著廣西巡撫提鎮悉心酌量於往來隘口及山僻可通之處撥兵添汛飭令該管官兵加謹巡查儻有私行出口之人務押解原籍照例治罪庶愚民不至流離異地而奸徒不致遠颺漏網矣○己丑諭大學士等西路防禦賊人之事已屢經降旨與大將軍岳鍾琪等豫爲留心料理但禦賊人之道務須計出萬全朕披覽輿圖見軍營至肅州中間甚爲遼闊而邊外一帶如赤金柳溝金塔寺沙州瓜州等處散處之民人甚多牲畜亦眾萬一賊人乘其不備而騷擾之則巴爾庫爾之大將軍何可分勢於各路堵禦凡此黎元皆吾赤子橫被擄掠荼毒於心實爲不忍況搶奪民人之牲畜卽爲賊眾之口糧則與我疲斃賊人之計亦大相左矣朕意當令居民豫度就近可居

之地一聞賊信卽遷移以避務期免其侵害若從前駐兵之處有應添兵力以保護百姓者亦著大將軍卽行調撥但不可分大營之兵勢使賊人此次遠來一無所獲所謂不戰而屈人之兵也但須善於奉行安慰民心勿使驚惶疑惑以致失所此朕爲恐邊外居民被賊侵害豫籌防範之大概也至於用兵之道固以防邊固本爲先而機會可乘亦不可失若但堅壁自守聽其肆行無忌雖有可乘之機仍復拘泥成見則又恐賊勢猖狂將來何所底止今冬西路已豫備賊眾若來我師以逸待勞以靜待動大將軍外觀形勢內度己力儻有可乘之機或發兵出擊以挫其鋒或堵禦隘口以遏其路或暗設埋伏以出其不意或趕逐馬匹以驚其眾心亦足使賊人喪膽但萬萬不可輕舉遠逐以分兵勢大將軍止在大營調度不可親身前去副將軍等亦酌量行之擊賊之時賊人

以馬兵前來我師以步兵出擊實勝於馬兵禦敵不可棄長就短
是以見在添派北路兵丁朕將漢步兵四千名派往大將軍當共
知此意則派撥各得其宜且使眾人各效其所長而大功可成矣
朕又細思西北兩路大營乃防邊擊賊之根本若果兩路大營堅
固整齊不爲賊人所搖撼則彼必瞻顧徬徨恐我軍截其歸路堵
其巢穴不敢肆行無忌卽如今春之率眾潛歸不敢久留西路者
恐北路之兵襲其後路也此番六月之不敢偏近科布多軍營者
又恐西路之兵搗其巢穴也目前賊旣得志於北路伊知北路兵
力不能進取則今冬仍往西路且增添賊眾更多於侵犯北路之
力量俱未可知總在大將軍先事圖維臨時權變勿貪功前進勿
坐失機宜斯爲美善又如賊人侵犯劫掠多在風雨陰晦之時此
際天氣潮溼槍礮之火藥難出弓箭之力量輒懈二者均未便利

當多備手槍挑刀等械以爲擊賊之具可助槍礮弓矢之力將此傳諭岳鍾琪知之○吏部議准廣東總督郝玉麟奏新會開平兩縣連界之大官田地方與兩縣城遠隔請增置一縣設知縣一典史一訓導一分新會縣藥運司巡檢改隸新縣從之尋定新設縣曰鶴山○增奉天府牛莊城倉官一○庚寅大學士等遵旨議奏四川總督黃廷桂奏請開捐積穀查通省積穀僅四十餘萬石爲數實少再買六十萬石請分作三年隨民間穀價貴賤約計每年買穀二十萬石每石約價三錢動支夔關及鹽茶盈餘銀六萬兩分發州縣總期三年內買足至各府州縣衝僻繁簡不等其大縣應貯若干中縣若干小縣若干府倉若干倉廩作何先期添造或該地方應貯蕎稗雜糧之處令該督撫分別酌議辦理得旨所議甚屬周詳妥協依議速行但每年穀價貴賤不等如畫定三錢恐

價貴時或至抑勒強買價賤時不免侵漁冒銷著再行詳議具奏
尋議四川穀石價值三錢爲率每年貴賤不等應隨時酌量如遇
價賤不及三錢即可過於二十萬石之數或值甚賤之州縣應及
時採買詳請酌量銀兩但遇價值不止三錢亦可不及二十萬石
之數或價值甚貴之州縣應停止採買以待來歲秋成總於三年
內通籌買足六十萬石買貯後照例存七糶三以免紅腐從之

八月癸巳諭大學士等肅州金塔寺原種進貢之哈密瓜朕思與
其種瓜何如種穀以資民食著行文該督撫等嗣後不必進獻並
著曉諭彼處民人知之○命鑲藍旗護軍統領侯馬蘭泰正黃旗
滿洲都統查克旦鑲黃旗滿洲都統公博爾屯原任西安巡撫武
格爲撫遠大將軍馬爾賽參贊○丁酉諭青海蒙古及番夷人等
朕統御萬方凡中外民人皆一視同仁莫不欲使之得所爾等沿

邊番夷及青海蒙古同受國家撫綏保護之恩並無歧視目今準
噶爾賊人窺伺邊境或將來侵擾青海蒙古而黃河以南之蒙古
畏避賊鋒投奔近邊番夷之地亦未可定爾番夷等須留心照看
切勿因向日曾有嫌怨乘其危急而加以戕害若蒙古中有不法
之徒搶掠番人者許番人用力抵禦不必退縮將來事定之後朕
自然以理斷其曲直分別賞罰番人蒙古皆朕赤子果能遵朕諭
旨彼此相安同受朝廷之恩澤方是爾等之福思之思之○吏部
議准署兩江總督尹繼善奏淮安府屬之山陽縣揚州府屬之江
都縣事務殷繁幅員遼闊請各添設知縣一分治查山陽縣屬廟
灣鎮見有城池營汛請改爲縣城令新設之縣駐紮再添設縣丞
一典史一移廟灣司巡檢駐草偃口鹽城清溝司巡檢駐上岡將
鹽城縣學訓導撥歸新縣又查江都縣原轄新舊兩城今酌量分

界舊城西屬舊縣東屬新縣新城南屬舊縣北屬新縣其邵伯上官二巡司並邵伯驛俱歸新縣瓜州萬壽二巡司並廣陵驛俱歸舊縣將原設之主簿訓導各一撥歸新縣並添設典史一再如皋縣東沿海一帶港口繁多縣令鞭長莫及請添設主簿一駐掘港場從之尋定山陽新分縣曰阜甯江都新分縣曰甘泉○庚子諭大學士等據副將軍石雲倬奏稱七月十三四等日有準噶爾賊人侵擾吐魯番副將王廷瑞等分兵迎敵與賊連戰屢勝生擒賊人七名殺賊二百餘人獲軍器馬匹不計其數等語王廷瑞分兵迎賊甚屬孟浪此番賊眾不過一二十人王廷瑞等幸獲小勝不但不足爲喜朕更爲吐魯番憂之賊人屢被吐魯番之敗創其懷恨益深必復以大眾報復石雲倬可速傳旨曉諭吐魯番嗣後賊人來犯但當堅守城垣不可迎敵若魯谷慶一城可以容住回民

人眾則合防守之官兵堅守一城愈妙如一城不能容住多人則別住於相近之哈喇火州等處將馬匹牲畜速行收拾城中柴草豫爲多貯以備應用賊眾若分兵來圍彼此堅壁清野俾賊人無所施其伎倆且有大將軍襲其後奪取其馬匹坐致疲敝自必遠遁亦不可追逐賊眾長於騎射吐魯番如於馬上比決勝負則回民十不及賊人之一若固守城垣以拒敵賊人亦十不及回民之一用我之長乘賊之短此萬全無弊之道也凡事持重鎮靜爲之能保護吐魯番城垣人眾其功勝於殺賊多矣○以左都御史史貽直協辦陝西西安巡撫事○吏部議准山西巡撫覺羅石麟奏大同府屬之大同縣縣令外止有典史一不敷委辦請添設縣丞一甯武府所屬四縣向係衛所今改併爲縣其倉糧業歸各縣經管所有舊設之神池利民倉大使二缺萬億廣永甯甯化倉副

使四缺請裁查甯化倉距縣百里所有倉糧請卽委甯化堡原設之巡檢收放永甯州所轄之方山堡離州寫遠請添設巡檢一駐紫舊城代州旣改爲直隸州管轄三縣請裁原設邊儲倉大使缺改設糧捕州判一代州所屬繁峙縣之平刑關最屬險要請裁原設倉大使缺改設巡檢一直隸平定州原設州判一奉裁未久請照舊復設直隸絳州解州均屬繁難要缺請各添設糧捕州判一從之○辛丑封喀喇沁貝子僧滾扎布爲貝勒○壬寅實授劉師恕內閣學士仍留福建觀風整俗使任○癸卯靖邊大將軍傅爾丹奏臣世受國恩蒙 皇上授以大將軍重任不能遵奉 聖諭妄動輕舉損折國家厯年生聚教養之將士上勞 聖慮不惟法不可容卽臣心愧赧亦難以偷生於人世今 皇上不卽加誅降旨慰諭復加賞賜實從古未有之隆恩但臣此次進討大臣數人

悉已身故臣若不勉勵將士收軍而同轉使賊人得計因與副將
軍巴賽查弼納等計議我等若死於賊則已今若輕生自殺其如
國體與將士何惟當竭力護衛餘兵至建城之處以待國討茲惟
有同心鼓勇力戰擊賊因遂曉示軍營奮兵率眾展轉而出同時
分軍統領者巴賽查弼納馬爾薩舒楞額等至今並無消息損兵
折將至於如此臣不但無以仰對 天顏亦何以腆顏統眾 皇
上縱格外施恩不加誅戮臣死之日難見陣亡將士於地下也今
臣已至城所安置哨站並傳諭喀爾喀副將軍等令其備運糗糧
固壘深溝以息將士招集商人謐甯蒙古諸務悉已就緒伏乞
皇上速遣賢將統率大軍將臣調回同臣妻子一併正法以昭國
憲得旨朕從前諭旨甚明朕之處事豈肯不持大義以定是非而
聊爲此目前慰勉之理惟輕信賊言冒險深入中賊詭計是爾之

罪至不肯輕生自殺力戰全歸此爾能辨別輕重之處事定之後

朕自有辦理之道爾若念慮紛擾以致血氣消耗不能報讎雪恥上損國威下玷家聲罪尤甚焉爾其勉勵勇氣安心敬攝計圖遠

大以答朕恩○甲辰諭內閣雲貴廣西總督鄂爾泰來京陛見於

署督高其倬到滇之後起身著乘驛按程而行所過地方派撥弁

兵護送沿途文武官員悉按該管上司之禮迎送供應○以索柱

爲額外內閣學士

由大理寺卿遷

○以刑部侍郎常賚爲西路副將軍調

西路副將軍正黃旗滿洲都統覺羅伊禮布爲撫遠大將軍參贊

○丙午諭大學士等據靖邊大將軍傅爾丹仍欲令兵丁在科布

多地方駐紮防護爾等會同大將軍馬爾賽將應撤之處確議具

奏再將查克旦率領駐紮庫布可爾地方兵丁應否撤於察罕叟

爾之處一併議奏尋議科布多駐紮兵丁遠隔察罕叟爾千有餘

里難於互相捍衛察罕叟爾地方與喀爾喀遊牧之地相近如將大兵會集一處駐紮不但軍威強盛防護亦有裨益應將科布多兵丁撤回察罕叟爾其駐紮庫布可爾兵亦應撤回察罕叟爾從之○諭理藩院青海扎薩克一等台吉恭格效力有年前羅卜藏丹津叛逆時在哈麻爾嶺奮勇殺賊今又追擒諾爾布著加恩封爲公爵○改江南甯城守右營遊擊缺泗州浦口二營守備缺俱爲都司僉書○戊申西藏貝勒頗羅鼐等奏報準噶爾欲送回拉藏之子蘇爾雜立爲西藏汗得旨準噶爾殺害拉藏將其子蘇爾雜擄去今稱送回西藏我兵須嚴爲防備從前策妄阿喇布坦遣策零敦多卜襲西藏時亦誑稱噶爾丹丹津同其女來藏乘其不備進兵襲取藏地今送回蘇爾雜之言正噶爾丹策零施行奸計若唐古特部落少爲玩忽卽蹈從前策零敦多卜之故轍矣準

噶爾賊人既殺拉藏豈有實心將蘇爾雜送回西藏令代父職之
理著頗羅鼐將此情由曉諭眾唐古特知之準噶爾人揚言發兵
五千護送噶爾雜道途險阻全軍豈能齊到目今西藏有內地兵
丁二千名換班兵丁五百名又駐防又木多兵一千名見催來藏
爾處亦有訓練蒙古兵丁應與駐紮西藏大臣會同商議於阿里
者斯肯圖魯克里野等處要隘遠設卡倫詳加瞭望協力防守準
噶爾賊眾若以兵隨蘇爾雜斷不可容留卽迎戰擊退賊敗走時
亦斷不可追襲蘇爾雜父兄被人殺害伊豈不忿恨若果思報讎
並感戴朕恩帶領數人恭順來歸爾等收留悉心安頓至若立汗
之事當令達賴喇嘛班禪額爾德尼奏聞於朕方可建立豈可令
噶爾丹策零任意妄行頗羅鼐原扶助拉藏效力行走後因拉藏
被賊殺害朕令爾料理西藏事務爾約束唐古特實心效力是以

加恩封爾爲貝勒今蘇爾雜若果率領數人來歸爾卽行奏聞候
朕另頒敕旨○己酉諭宗人府順承郡王錫保自派往軍前以來
辦理軍務克殫誠心勤勞宣力甚屬可嘉王之祖多羅穎郡王亦
係國家懋著勞績之賢王著將錫保晉封順承親王○諭內閣雍
正七年八月內降旨陝西四川直隸山東山西河南等省所派出
征之大小官弁俱係能員嗣後六省所出之官弁員缺著該上司
委員遞行署理准其算俸俟凱旋之日將出征之員與委署之員
合併比較揀選引見請旨補授蓋欲使效力疆場之人卽可得缺
升遷而委署稱職之人材亦得兼收並用實兩全之道也但行之
二年委署之員漸多實授之員漸少每遇缺出該管大員往往以
不得合例委署之員甚費籌度前經陝西總督查郎阿請將委署
之員越次再行委署朕已降旨允行又請揀發遊守等官二十四

員爲陝甘二省之用朕又降旨令將出征有功新回營汛之人揀
選題補矣今思各省出征之員未能卽回本任而委署之缺日積
日多則題補之法應行變通著於十缺之中分出三缺爲出征弁
員升補之缺北路者交與大將軍馬爾賽西路者交與大將軍岳
鍾琪揀選題補其餘七缺則將本省之弁員或卽行題補或暫行
委署令該管大臣酌量施行其直隸之缺交與提督路振揚甘陝
二省交與署督查郎阿河東二省交與總督田文鏡四川交與總
督黃廷桂山西交與石麟石麟著以巡撫署理山西提督事務給
與印信通省武弁聽其管轄○辛亥大學士忠達公撫遠大將軍
馬爾賽啓程 上命 皇四子 告祭 奉先殿王以下官員俱
至西長安門外送行○甯遠大將軍岳鍾琪奏臣遵旨襲擊烏魯
木齊於七月十二日自巴爾庫爾啓行從伊爾布爾和邵地方經

行五百餘里直至穆壘河地方並無賊夷卡倫於二十三日臣統領大隊沿途擊賊至阿察河有賊夷數百人在前引誘臣卽嚴整攻殺賊夷敗走我兵追至厄爾穆克河賊夷在隔河踞住山梁排列三處約有三四千人臣先令總兵張元佐等領步兵爲右翼提臣紀成斌等領馬兵爲左翼總兵王緒級曹勳等領兵由中路而上居中策應又令參將黃正位等帶領勇健兵從北山鈔襲賊人之後官兵齊進奮勇爭先飛奔山梁直衝賊隊自辰至午將三處山梁俱皆奪取賊夷往西敗遁殺死賊夷不計其數因山路崎嶇天色將晚我兵不便窮追臣卽收兵紮營於二十四日接奉 上諭令臣略行襲擊卽撤兵回營臣追趕賊夷離納鄰河不遠至烏魯木齊僅有兩日路程因烏魯木齊一帶賊營搬移已空深入無益臣於七月二十五日統領大兵回赴巴爾庫爾仍按程埋伏精

兵禦後以防賊夷尾隨偷盜馬匹理合奏聞得旨岳鍾琪此次領兵剿擊賊眾進退遲速俱合機宜弁兵等鼓勇爭先同心效力甚屬可嘉著岳鍾琪將在事有功之人分別造冊送部俟成功之日一併從優議敘賞賚其陣亡及帶傷之兵丁著照例賞卹○靖邊大將軍傅爾丹奏臣至科布多後詳訪巴賽等總無確音今有從賊營逃回之正紅旗前鋒校薩明阿據稱中賊刀傷被擒在賊營遇土默特夸蘭大查布云副將軍巴賽查弼納於六月二十八日越嶺至一小河俱各戰歿又有賊營逃回之正黃旗護軍海壽係參贊馬爾薩傳事之人據供於六月二十八日隨馬爾薩至哈爾哈納河相近紅石巖下馬爾薩中槍陣亡海壽救援被擒等語至舒楞額未得確音俟查明再奏報聞○是月免江南無爲甯國等十州縣鳳陽長淮二衛雍正八年被災額賦有差

九月辛酉朔諭內閣前據奉天將軍等奏請設立水路防汛於草河靉河等處朕因此地與朝鮮國連界恐於該國或有不便之處特行降旨詢問今該國王奏請仍遵舊例著照所請不必添設防汛亦無庸交兵部再議○癸亥諭喀爾喀弁兵等喀爾喀騎射諳練丁壯強幹勇於戰陣厄魯特不嫻騎射性懦弱而誇張惟長槍是賴一經敗北不敢回視後因喀爾喀傾心經典惟以尊崇佛教爲事不習技勇而厄魯特巧詐性成乘爾七旗不備突然加兵是以被其攻擊不能保全遂至失所當土謝圖汗澤卜尊丹巴胡土克圖奔赴 聖祖皇帝請救時 聖祖憐念從前恭順納貢收留養贍安插內地其喀爾喀各頭領仍照向來等次晉封汗王貝勒貝子公台吉扎薩克加恩賞給俸祿令各回原處居住安享康樂迄今已三四十年矣從前大兵於烏蘭布通地方擊敗噶爾丹噶

爾丹復來犯克爾倫地方 聖祖親統兩路大兵征剿噶爾丹於
圖拉地方被我兩路大兵擊敗勢窮力竭奔至薩克薩圖古里克
地方死亡殆盡其後因策妄阿喇布坦煽誘離間意在收取喀爾
喀 聖祖洞悉其情保護喀爾喀於疆界處駐兵十有一年又以
準噶爾偏近喀爾喀不免侵擾命大兵踰阿爾泰深入額敏寨爾
地方再三掃蕩厄魯特肝膽俱碎今知噶爾丹策零又欲侵擾喀
爾喀朕於扎克拜達里克及察罕叟爾等處不惜千萬糧餉添兵
數萬特爲喀爾喀耳邇來北路軍前將軍大臣等輕兵進剿未及
深察地利頗爲失律然鏖戰十有餘日殺傷賊人數千行軍勝負
乃其常事聞爾喀爾喀以宵小捏傳準噶爾賊由科布烏蘭古木
地方兩路來犯之語坐臺喀爾喀竟各棄牲畜搶奪驛馬離站四
散爾喀爾喀各台吉感恩效力朕所深知爾等屬人止據流言遽

爾驚竄何懦怯之甚歟爾等試思之準噶爾賊人盜取馬匹而外不敢與勁敵曠日持久計其人眾不過三四萬內地大兵數萬見駐爾地西疆何必畏懼退縮乎今準噶爾賊動曰往食懦弱喀爾喀卽此一言豈丈夫之所堪受昔日噶爾丹攻擊爾等時和托輝特根敦貝子希卜推哈坦巴圖魯等尾隨噶爾丹擊敗準噶爾取其馬匹駝隻和托輝特亦喀爾喀部落人也爾等何妨效法之嗣後喀爾喀各部人將朕所降諭旨各銘於心凡遇行陣坐卡殿後等處勇往效力斷不可上負 聖祖及朕深恩並貽羞於爾部主不過數年勞瘁便可永息兵革常享安樂矣其各勉之○甲子副都統達爾等遵旨議奏青海拉查卜原係貝子從前羅卜藏丹津叛亂時餘眾俱赴西甯伊獨逃往喀木地方從寬降爲公爵今又無故逃遁拉扎卜理應正法但伊因畏懼逃遁追兵一至卽便迎

降請從寬免其正法將拉扎卜交與西甯總兵官永遠圈禁其長子察罕拉布坦豫先歸降請停其承襲公爵授爲扎薩克一等台吉管領該旗佐領下人至與拉扎卜同逃之扎薩克台吉查漢喇卜灘向係圖爾古特微末台吉相依親王戴青和碩齊察罕丹津因不從羅卜藏丹津叛亂 皇上加恩授爲扎薩克一等台吉乃無故逃遁追兵既至尙不迎降以致被擒理應正法但並未乘亂生事亦從寬交與西甯總兵官枷鎖嚴禁再查漢喇卜灘之族弟協理二等台吉達爾濟見在駐牧居住不肯同逃請將查漢喇卜灘之扎薩克台吉令其承襲則伊屬佐領不至改隸他人矣得旨拉扎卜係察罕丹津兄之子察罕丹津效力有年著將拉扎卜寬免交察罕丹津管轄查漢喇卜灘從前征剿羅卜藏丹津亦曾效力並著寬免交伊弟台吉達爾濟嚴加管束餘依議○丁卯以鄂

爾奇爲兵部尙書福敏爲左都御史

協理兵部侍郎

○以申珠渾爲盛京

禮部侍郎

由左副都御史遷

○戊辰靖邊大將軍傅爾丹奏賊人侵犯洪

甲舒魯克地方離科布多城有五十餘里臣將馬匹牲畜收入城

中固守得旨大將軍馬爾賽並無軍營急辦事務今賊人又來犯

科布多地方可行文令其緩行前進若臺站已斷或酌量回來或

尋嚴固地方駐紮偵探○宗人府遵旨將恭親王子孫十二歲以

上者八人等帶領引見得旨前因滿都護病故無子海善雖有子

恐不能保守恭親王家業故特交與諸臣議奏今經宗人府查明

引見始知尙善子孫甚多朕看倫木布之子斐蘇人聰慧尙可保

守家業著將斐蘇仍封爲多羅貝勒將原管佐領查明給回○辛

未調王國棟署浙江巡撫以喬世臣署江蘇巡撫○調刁承祖爲

江蘇按察使以唐繼祖爲湖北按察使

由署河南按察使鴻臚寺卿遷

○壬申靖

邊大將軍傅爾丹奏據烏蘇舒魯克卡倫之侍衛達什爾圖報稱賊人駐紮紅鄂羅腦兒地方約有萬人又科布多城外三十餘里有賊兵五六百名往布延土前去等語臣等固守城池如攻城賊兵人少勢弱卽相機勦殺報聞○甲戌郝玉麟因病請假允其暫解印務在署調理以張鴻署廣東總督_{由廣東提督署}○吏部議准江西巡撫謝覓奏設官移駐事宜一南昌府屬新建之吳城一鎮前經部准署撫臣張坦麟奏請將南康府同知移駐彈壓遂以吳城改隸星邑凡遇查拏匪類拘審人犯關移往返轉致稽遲請仍隸新建一吳城鎮商民繁雜離縣寫遠應設大員彈壓請令南康府同知兼轄吳城捕務其相近之樊家壠及松門吉山等處俱令該同知管轄一吳城汛地原係南昌水師營弁兵駐防嗣因改隸星子故於九江協內派兵防守今旣復歸南昌應將九江協弁兵撤回

仍於南昌水師營派撥一松門吉山俱在鄱湖之中二山相去十里控禦迢遠止有吉山一汛請於松門添設一汛亦令南昌營水師撥兵駐防得旨依議前經張坦麟條奏請將南昌府新建縣之吳城鎮改隸南康府星子縣管轄經部議准行在案今該撫謝覲奏稱不便從前張坦麟冒昧陳奏妄事紛更甚屬不合嗣後文武官員等儻有將地方不可施行之事妄自陳奏舉行經後任復請更改者將原奏之人交部議處儻原奏本是而後任妄爲指摘或有意翻案者經朕察出亦必從重處分將此永著爲例○乙亥李衛來京陛見以李燦署浙江總督

由江南崇明總兵官署

○丙子振武將軍

順承親王錫保奏據圖壘卡倫之察哈爾章京西拉等報稱圖壘毛海控科爾苦克齊圖等處俱有賊兵往來又賊兵二千餘由阿哈爾拜已至奎蘇地方並分兵往大蘭一路等語臣卽令喀爾喀

副將軍郡王額駙策凌貝子羅卜藏等統兵分路往尋賊蹤如有偷盜牲畜之賊卽行擊殺賊如大隊來犯合兵會剿報聞○戊寅諭大學士等從前大將軍馬爾賽奏稱聞賊人來犯科布多之信臣請暫居第十五臺候順承親王再發咨文差人至推河探信賊來犯察罕叟爾臣往會漢軍兵營調右衛一千兵歸化城一千兵在吳喇忒北形勝之地駐紮以安慰內地扎薩克若無賊信仍往察罕叟爾等語朕以此奏甚是宜駐臺站不必前往察罕叟爾辦事令將右衛一千兵歸化城一千兵俱各妥備聽候馬爾賽調遣續經馬爾賽又奏稱賊人駐於科布多地方近處臣自十五臺起行差人前去探信急赴察罕叟爾等語朕以此奏妄謬仍令其遵旨駐紮臺站朕兩次所降諭旨尙未到今馬爾賽又奏稱賊人已至奎蘇地方欲會合漢軍四千兵喀喇沁一千兵並調右衛歸化

城各一千兵前赴推河等語凡事宜審定之後方可相機而行若聞一賊信卽展轉不定如何辦理馬爾賽今帶領七千兵至推河何用此奏甚屬不合近喀爾喀副將軍丹津多爾濟奏稱若令漢軍兵四千駐紮在四子部落旗分皆曠野之地如遇雪大之年必無柴薪請將此兵駐紮歸化城相近有柴之處等語已經行文於領兵前往之侍郎諾爾渾等令暫駐歸化城翁滾山附近有柴木水草之處候旨爾等行文馬爾賽賊人若無侵犯察罕叟爾搶臺等信仍遵前旨駐紮臺站儻有賊信急退回歸化城相對第十四臺駐紮候旨○調勵廷儀爲吏部尙書以劉於義爲刑部尙書仍署理北河總督事務○吏部議准廣東巡撫鄂彌達奏添設移駐官弁事宜一粵東新會開平兩縣交界之大官田及清遠英德兩交界之大埔坪均屬衝要請各設埔盜同知一專司督捕一大官

田同知所轄有新會新甯兩縣距廣南韶連道駐紮之地甚遠請將該同知歸肇羅道就近統轄大埔坪同知所轄有廣甯長甯兩縣距惠潮肇羅二道駐紮之地甚遠請將該同知歸廣南韶道就近統轄其大埔坪地方請撥右翼鎮標左營千總一帶兵三十名駐防協緝並交該同知管轄一陽江縣之海陵島電白縣之沙壩墟離縣寫遠均爲要地請各添設巡檢一以資防範一粵東理猺同知向係兼管連州連山陽山三州縣捕務後因改爲理猺軍民同知專理猺事所有三州縣事務停其兼管邇年以來猺人馴服事理不繁請將三州縣捕務仍歸理猺同知一體查察一欽州如昔司止設巡檢一不足以資彈壓請將廉州府同知移駐其地再崖州外接安南內鄰五指生黎請將瓊州府海防撫黎同知移駐其地又高州府屬之梅菪地方奸徒出沒請將該府通判移駐專

司捕務又羅定州屬東安縣之西山夙稱盜藪請將原設羅苛司巡檢改爲西山司巡檢移駐稽查並撥河頭營把總一帶兵二十五名駐防協緝其羅苛司原管地方改歸東安縣典史專管一潮肇二府通判請兼捕盜職銜各分地方經管督緝潮州府同知見駐饒平縣黃岡專理海防事務請將附近之饒平惠來海陽潮陽澄海普甯六縣捕務歸該同知專管其附近郡城之揭陽大埔程鄉鎮平平遠五縣捕務歸肇慶府同知管理德慶封川開建四會四州縣捕務歸通判管轄從之○庚辰諭大學士等據大將軍馬爾賽奏稱本月十四日臣從第十九臺退回欲往會漢軍兵營已行令領兵侯馬蘭泰等於吳喇忒之愛卜哈河地方擇有水草駐紮候臣調遣等語前伊數次奏摺朕俱明降諭旨令伊駐紮臺站今馬爾賽若離臺站往會漢軍兵營諸凡信息從何得聞漢軍兵

既令駐紮吳喇忒之愛卜哈河地方伊又欲何處調遣奏事並不
候旨意見昏憤甚屬不合爾等可行文馬爾賽等令漢軍四千兵
喀喇沁一千兵俱於歸化城翁滾山附近有柴木水草之處過冬
馬爾賽仍遵前旨於歸化城相對第十四臺駐紮○吏部議准署
直隸總督唐執玉奏順天府各州縣程途遠近惟通州爲適中之
地請將西南兩路同知所管之大興宛平東安永清固安房山良
鄉涿州等州縣以及東路同知所管之新設甯河縣旗人一切刑
名事件改歸通州理事通判就近審理各由該路捕盜同知覈轉
再解臬司道路既不紆回人犯得免拖累從之○甲申命貴州開
局鼓鑄○丙戌禮部尙書錢以塏年老乞休加太子少保銜致仕
○丁亥吏部議准山西巡撫覺羅石麟奏晉省吉州並所屬之蒲
縣及隰州並所屬之汾西縣舊係平陽府統轄經撫臣諾岷題准

將吉陽二州改爲直隸州以蒲縣鄉甯二縣歸吉州管轄以大甯
永和汾西三縣歸隰州管轄但歷考舊制蒲縣爲隰州之門戶而
汾西實爲平陽之臂指請將吉州屬之蒲縣改隸隰州隰州屬之
汾西縣仍歸平陽府一切政務庶爲妥便從之○兵部尙書署直
隸總督唐執玉因病乞假允之○戊子以阿蘭泰爲左副都御史
由內閣額外侍讀學士遷○以劉於義署直隸總督調沈廷玉爲直隸河道總
督以朱藻爲河東河道總督由協辦總河事○以高斌爲河東副
總河徐聚倫爲河南布政使由山東○己丑 皇后那拉氏崩○
庚寅 上輟朝五日奉移 大行皇后梓宮於九經三事殿
冬十月癸巳諭大學士九卿等皇后崩逝朕心震悼此時卽欲親
臨含殮大臣等以朕躬初愈本日已經臨視不宜再勞懇詞力阻
朕勉從其請暫停前往今該部具奏祭奠禮儀日期朕思 皇考

昔年於 皇妣孝誠仁皇后 孝昭仁皇后之喪如何親臨盡禮之處朕雖未見至康熙二十八年 皇妣孝懿仁皇后崩逝當梓宮未移之時 皇考朝夕臨奠及奉移之後每遇祭祀日期悉皆親往此朕所親見者今皇后自垂髫之年奉 皇考恩命作配朕躬結褵以來四十餘載孝順恭敬始終一致忽焉長逝實深愴惻一切致祭典儀本欲親往以展悲懷乃自上年以來朕躬違和調理經年近始全愈醫家皆言尙宜靜攝不可過勞因思上年怡賢親王薨逝之後朕悲情難遏曾親奠數次頗覺精力勉強朕躬受 皇考付託之重 宗社攸關爲億萬臣民所倚賴今夙恙初痊正當加謹保護況目前軍務緊要一切機宜甚費籌畫若又親臨喪次不但往來奠醊之間外勞形骸而觸景增悲更致內傷心氣實非攝養之所宜卽朕自度力量亦覺勉強但今皇后喪事國

家典儀雖備而朕躬禮數未周於理恐有未協於情實爲難忍權衡輕重之間如何可使情禮兼盡以慰朕心著公同定議具奏尋議 聖躬所關至重至大時居初冬天氣作寒 聖躬雖已全安尙須加謹保護 大行皇后諸事俱已遵照舊章儀文隆備前月二十九日 皇上已經臨視若遇祭祀之期又復親往奠醑勞動悲傷實非所宜伏查明代會典皇后喪儀止載皇子及百官應行典禮無親臨祭奠之儀今 大行皇后喪次有皇子朝夕祭奠若遇祭期例可遣官致祭伏乞停止親往從之○丁酉移 大行皇后梓宮於田村蘆殿○戊戌撫遠大將軍馬爾賽奏據辦理扎克拜達里克糧餉原任巡撫西琳報稱賊人來至扎克拜達里克城南噶爾特地方劫掠牧場駝馬因守城兵少未敢追逐又據三十臺至四十二臺章京額林沁等陸續報稱各臺俱有賊蹤係在

推河居住厄魯特王色卜騰旺布及貝勒多爾濟色卜騰之屬下人乘機擄掠報聞○刑部等衙門議奏據辦理青海事務都統德成等擒獲叛賊諾爾布里塔爾解部審訊諾爾布係圖爾古特一小姓台吉來至青海依人生理於羅卜藏丹津叛逆時伊父曾效涓埃 皇上格外加恩不令隸屬青海特授扎薩克一等台吉又選派柴旦木軍前忽行叛逆搶劫馬匹拒捕官兵里塔爾身爲佐領附逆作亂俱應照律擬斬解往青海立決示眾查諾爾布叛逆時妻子皆在遊牧地方聞信卽來請罪應免其爲奴其胞弟色特爾布穆旣不知情又追捕拉查卜有功 皇上已加恩令其承襲扎薩克一等台吉諾爾布妻子卽交與色特爾布穆管束養贍得旨諾爾布里塔爾俱著解送西甯口外卽行正法免其示眾餘依議○庚子以散秩大臣伯欽拜理藩院左侍郎納延泰副都統阿

岱俱爲撫遠大將軍參贊○改廣東化石營守備缺爲都司僉書
○乙巳諭撫遠大將軍馬爾賽爾從前奏稱備兵一事已行文於
順承王等語爾領兵尙未至察罕叟爾並不知軍前之情形卽欲
指示順承王殊覺不合見今蒙古扎薩克等俱遵靖邊大將軍印
信行事若又用撫遠大將軍印信調遣則蒙古難以遵行撫遠大
將軍印信除奏章及行部咨文鈐用外其調遣兵丁等事不准鈐
用昨爾又奏稱吳喇忒毛明安四子部落蘇尼特阿霸垓等旗察
哈爾兩翼各豫備兵一千聽其調遣等語吳喇忒等扎薩克察哈
爾旗皆邊外之兵豈可妄動爾卽欲豫備調遣亦當請旨乃並不
奏聞卽行調遣甚屬背謬再爾所偵探軍機並不確實卽行具奏
辦事亦甚含糊爾宜盡其所長效力行走○丙午以吳金爲額外
內閣學士由郎中遷○戊申以魏廷珍爲禮部尙書由湖北巡撫遷○青海厄

魯特郡王額爾得尼厄爾克托克托奈奏 皇上憫臣年邁特降
恩旨於臣諸子中可襲王爵者命臣舉出一人加恩封爲長子代
臣效力行走伏思臣長子阿拉布濟奉旨領兵往紫柴旦木因擒
獲叛逆諾爾布已蒙授一等台吉臣之三子索諾木丹津年二十
三歲立志向上守正而行臣遵旨請將此子襲替得旨索諾木丹
津著照所請封爲長子阿拉布濟效力行間加恩晉封爲輔國公
○甲寅吏部議覆署陝西巡撫史貽直奏參革興安州知州張勤
寵除嗜酒貪佚無故稽留屬員各輕罪不議外其收受紗錠計價
三兩六錢按律應擬杖七十得旨張勤寵嗜酒貪佚無故稽留屬
員此等舉動難以居官臨民議以斥革洵不爲枉若計賊論罪必
有貪婪實蹟方可引律定擬今以紗錠微物所值不過幾金卽論
賊議以杖責則苛細太甚大失平允之義封疆大臣察吏當執公

平之法而定罪亦當體可恕之情張勸寵杖罪著寬免○乙卯振武將軍順承親王錫保奏準噶爾賊人大策零敦多卜小策零敦多卜多爾濟丹巴等於八月十一日自夸額爾齊斯至索爾畢烏拉克秦地方留兵四千以爲應援領兵二萬六千來犯科布多等處科布多察罕叟爾扎布韓軍營兵威強盛防守嚴密遂直抵克爾倫侵取喀爾喀遊牧今賊將海倫鄂爾哲等領兵三千前去劫掠策零敦多卜之兵向蘇克阿爾達胡屯紮又令小策零敦多卜之子曼濟領兵三千往鄂爾海錫拉烏蘇等處搶掠牲畜九月二十日臣令王丹津多爾濟額駙策凌等合兵向蘇克爾達胡擊賊二十一日至歐登楚爾地方遣台吉巴海等領兵六百名夜至大策零敦多卜賊營擒賊三人而還大策零敦多卜遣賊將滾楚扎卜錫拉巴圖魯領兵三千來追巴海等誘至歐登楚爾大營二十

二日王丹津多爾濟策凌列陣力戰自辰至午陣斬賊將喀喇巴圖魯其賊將錫拉身負重傷率賊敗遁復擒殺數百餘賊是夜策零敦多卜等卽移至台錫里山屯紮二十五日曼濟兵敗回營俱退至哈布塔克拜塔克地方遁去臣思準噶爾賊人乘機深入分路侵犯妄思劫掠仰仗 天威王丹津多爾濟額駙策凌等領兵直抵賊巢奮勇擒殺賊兵遠遁臣等見在選兵追襲其有功將士查明再奏得旨喀爾喀副將軍親王丹津多爾濟郡王額駙策凌率領喀爾喀弁兵奮勇爭先戰敗準噶爾勦殺擒賊甚屬可嘉丹津多爾濟從前效力已加恩封爲親王著賞銀一萬兩郡王額駙策凌晉封爲和碩親王亦賞銀一萬兩扎薩克圖汗親王策旺扎布雖未歷戰陣在營同順承親王宣力辦事亦賞銀五千兩其餘王貝勒貝子公眾台吉官員兵丁內懋著勤勞者著順承親王查

明具奏加恩優賞○丙辰晉封貝子弘春爲貝勒○振武將軍順承親王錫保奏王丹津多爾濟額駙策凌等分路追擊大兵登達爾畢山瞭望賊蹤並無煙塵計賊人已過阿爾泰山難以前進追擊隨卽撤兵報聞○戊午諭靖邊大將軍傅爾丹等爾等在科布多地方恃勇輕進墮賊詭計致失地利損兵折將軍前獲罪我朝例所不貸本應執法究治但傅爾丹整頓餘兵回至科爾多地方固守城池賊眾併力來犯復能列陣以待賊人遠遁隨卽遣兵各處截殺奪回被掠馬駝此次擊賊可贖爾等前罪今朕已盡行寬免惟陳泰罪不可宥爾等嗣後須勉效力朕自格外加恩○是月免江南邳州山陽等二十三州縣潼安一衛雍正八年水災額賦有差

十一月庚申諭大學士等昨據順承親王及傅爾丹等奏報知

北路賊兵已退邊境甯謐已寄知大將軍岳鍾琪令其不必發兵
往阿濟畢濟矣但思賊兵雖離北路冬間或向西路自應仍前防
範至於吐魯番屢拒賊兵賊人銜恨將來擾害吐魯番勢所必有
今雖暫派官兵三千名駐防然究非長久之策回民應否遷移官
兵何時可撤著岳鍾琪悉心籌畫具奏○壬戌命馬爾賽率兵由
歸化城往扎克拜達里克駐紮○癸亥靖邊大將軍傅爾丹奏官
兵已至察罕叟爾命順承親王錫保爲靖邊大將軍降傅爾丹爲
振武將軍協同辦理軍務○改河南陝州營守備缺爲都司僉書
增千總一○甲子諭大學士等爾等可傳諭傅爾丹伊原與順承
親王不合王諸事並無過失近日傅爾丹輕進以致虧損官兵若
大將軍印務仍命管理非但眾心不服卽傅爾丹心亦不安伊旣
失蒙古等之心綠旗兵丁亦未必孚信伊所恃者惟數索倫耳豈

知首先潰散幾致伊於危殆者卽索倫乎順承親王諸事遵朕指示領大兵在察罕叟爾賊夷懼其聲威不敢侵擾旋卽敗遁朕今令傅爾丹爲王協理以贖前愆至殲賊立功唯王是賴傅爾丹悉心盡力勉圖報效若仍執前見妄存私意與王不和不但無益於國家傅爾丹恐益增罪戾矣○乙丑以史貽直爲兵部尙書由左都御史○大學士等遵旨議奏扎克拜達里克地方甚屬緊要馬爾賽所領漢軍兵四千名卽令馬爾賽統領前往扎克拜達里克地方駐紮見今可分作八隊起程馬爾賽起程時撫遠大將軍印交送康親王暫管另給一印與馬爾賽伊領兵到扎克拜達里克時與欽拜阿成阿等所領兵丁俱聽順承親王調遣得旨依議馬爾賽著給與綬遠將軍印阿克敦等卽令隨馬爾賽前往辦理印務○丙寅諭喀爾喀汗王貝勒貝子公扎薩克台吉並各屬下人等近

日準噶爾賊夷噶爾丹策零寄信與王喇嘛扎卜稱喀爾喀厄魯特法教相同本屬和好及噶爾丹博碩克圖時失睦既而我父追念前好曾屢奏 皇帝乞將喀爾喀青海復舊安置今 皇帝欲將我如喀爾喀青海入於旗下佐領之內給與封號以故我等興兵至此若能成事則將喀爾喀青海照舊安置卽不能成事亦不令統屬於人等語此實係賊夷奸詐離間之詭計從前爾喀爾喀人等被噶爾丹戰敗以致失地我 聖祖皇考憫念爾等歸誠存恤愛養將喀爾喀諾顏等按伊原品封爲汗王貝勒貝子公扎薩克屬下人等俱各賜生業安享富饒令歸原遊牧處爾等之感恩報德同心效力乃人所共悉者準噶爾賊夷出狂悖之言借安置爾等爲詞欲肆行擾亂卽論爾等之封號親王郡王貝勒貝子等爵位俱係我朝冊封宗室子孫兄弟之號其餘臣下雖效力立功

並無封貝子之例惟四十九旗扎薩克成吉思汗之後博爾濟錦氏台吉等誠心歸順我 太宗皇祖俱賜以宗室封號視如骨肉結爲姻親累世榮寵何常視爲奴僕乎至編設旗分佐領亦欲其易於查考以便加恩並恐扎薩克等互起爭端之故今已及百年何嘗役使爾等一人乎自分旗以來爾喀爾喀之鄂托克達魯哈等屬便於查管遇饑饉則賑濟之行圍出兵則厚賚之何有催徵之事乎此亦爾等所共知者準噶爾賊夷奸詐狡獪外託黃教而擾亂藏地違背教源口雖稱爲青海喀爾喀兩家而又搶掠爾等將胡土克圖俱欲搶奪奸惡極矣且準噶爾一姓自厄爾柏克尼古勒蘇克齊汗之後興兵擾亂諸部落殘殺博爾濟錦氏幾至斷絕至今讎怨未已今策零敦多卜前來被爾喀爾喀等勦殺敗遁賊夷懷恨必深思欲報復乘隙擾亂若賊夷之事不定則爾喀爾

喀不得安眾蒙古亦不得安朕是以不惜國帑發數萬大兵遠行
征勦綏靖邊圉止爲爾等生全之計也爾屬下人等宜仰體朕心
各加奮勉藉朕威力效法此次進兵之王貝勒貝子公台吉等朕
必爲爾等勦滅賊夷永保安甯前者噶爾丹作亂時爾等互爲搶
掠盜竊今又有搶掠盜竊者此種惡習甚屬愚賤其務力爲悛改
且爾等旣屬內地多年共知法度若舍棄遊牧擅行掠竊干犯王
章何不力戰賊夷立功雪恥乎卽爾等歸順賊夷亦斷不能保全
爾等令爾等安享也爾等宜熟計之○諭青海王貝勒貝子公扎
薩克台吉等近日準噶爾賊夷遣策零敦多卜二人領賊眾越阿
爾泰來侵喀爾喀欲搶掠克爾倫及劫取澤卜尊丹巴胡土克圖
被喀爾喀副將軍王丹津多爾濟額駙策凌等率兵分路迎擊勦
殺生擒並獲其駝馬賊夷敗遁因轉思離間寄書與喀爾喀善巴

岱青王之孫王喇嘛扎卜希圖誑誘擾亂成事喀爾喀深知賊夷詭計父子前後一轍忿怒痛恨不改初心今爾青海台吉等久荷聖祖皇考冊封位號寵顯榮厯有年所至於編設旗分以便稽查賞賚復恐扎薩克以強凌弱互起爭端譬之厄魯特有得沁者有鄂托克者有扎薩古爾者有得默齊者皆爲易於管轄而已爾有饑饉朕必加周給隨獵行兵必加賞賚從無徵輸爾蒙古者朝廷恩典至優至渥矣若以封號旗分爲賤亦可奏明酌改且爾厄魯特之台吉阿巴賴諾顏之子孫見在準噶爾處果爲帥領乎抑爲屬下乎卽如羅卜藏丹津降附賊夷卽將伊所屬分散爲奴較之受天朝封號孰榮孰辱準噶爾原係成吉思汗之奴隸爾等俱係成吉思汗之弟哈布圖哈撒爾之子孫若以博爾濟錦氏諾顏等之先世論之準噶爾乃爾等之奴隸也奈何甘心自屈受制

於奴隸乎可自思之爾等當知賊夷詭計勸諭屬下分別利害令其亦如喀爾喀之奮勇立功豈可甘爲懦怯受賊夷蹂躪乎朕因準噶爾反間致書故又諄諄降旨爾等如能遵行則可以保全妻子遊牧永享安甯之福矣○丁卯諭內閣四川重慶府知府馬世端原係巡撫憲德題升之員今因溺職被參憲德自行檢舉數年以來凡遇督撫自行檢舉之案朕皆令大學士等兩擬票籤進呈是以憲德此案大學士等於照例擬票外亦添從寬免擬一籤但朕詳閱此本王鴻勳縱役殃民馬世端徇情容隱乃司道揭報而督撫題參者朕思司道旣已揭報則憲德安能隱匿不參與督撫查出糾參者不同難援自行檢舉之例免其議處也憲德仍交部議嗣後有與此等相類者不必兩擬票籤○改山東臨清沂州沙溝梁山等營守備缺俱爲都司僉書○戊辰以劉應鼎爲四川布

政使高維新署四川按察使

原任四川布政使

○改江蘇嘉定縣江灣司

巡檢爲南翔司巡檢移駐南翔鎮○改湖北湖南撫標中軍遊擊

缺爲參將督標中軍守備黃州龍陽九谿永順等協中軍守備道

士汛永定等營守備各缺俱爲都司僉書○庚午以浙江杭嘉二

府屬蟲災命減價折徵漕米○移四川小河營遊擊駐南坪改永

甯協左右營遊擊夔州協中軍守備及通巴忠州平番柏香馬邊

大壩安阜梁萬阜和甯安德靖潼縣等營守備各缺俱爲都司僉

書○辛未靖邊大將軍傅爾丹奏臣率領大兵於本月初六日已

至察罕叟爾京師滿洲兵臣自行統率在察罕叟爾之東巴顏布

拉克地方過冬歸化城土默特之兵令與王桑里達居住之濟斯

布隆地方附近駐紮盛京船廠右衛察哈爾哈喇沁土默特綠旗

兵離滿洲營相去五里次第安營黑龍江兵丁令在大營之北扎

哈蘇泰呼集爾圖地方駐營防守得旨交辦理軍機事務大臣等
議奏尋議本月初四日靖邊大將軍印卽令順承親王掌管應行
文順承親王將各處弁兵如何擇地屯紮之處會同傅爾丹酌量
辦理從之○癸酉改山東文登膠州二營中軍守備甯福壽樂二
營守備各缺俱爲都司僉書○甲戌諭大學士等朕因陳泰罪不
可宥曾嚴降諭旨今傅爾丹奏內仍以陳泰爲參贊開列職名甚
屬錯誤爾等行文與順承親王陳泰至察罕叟爾時著卽革職鎖
拏嚴審具奏○丙子以塔林爲額外內閣學士署刑部右侍郎原任西安布政使○己卯諭八旗都統等八旗漢軍兵丁技藝俱未嫻熟皆
失於訓練所致今於額數之外挑選丁壯二千名另設一營教習
訓練務期精銳再入旗漢軍勳舊大臣等子弟因其父兄失於教
導甚乏可用之才朕心深爲憐憫見今尙耿石李佟祖蔡王諸家

之子弟無論在京在外其年至十五以上二十歲內外者著揀選帶領引見朕量其才器令其學習行走日後俾得成就以副朕加恩造就勲舊子弟之至意○以彭維新爲左都御史轉俞兆晟爲戶部左侍郎以韓光基爲戶部右侍郎

由副都統遷

○庚辰諭大學士

等喀爾喀郡王汪扎爾前因追殺逃走之烏梁海由貝勒封爲王爵去歲軍營送駝誤期經部議黜革此次出兵著賞給汪扎爾貝勒原爵同公策凌旺布領兵前往○辛巳添設三姓地方副都統一佐領六防禦四筆帖式二披甲八百名○戊子大學士等遵旨議奏據傅爾丹奏稱管領喀喇武兵一等塔布囊丹巴從軍剿賊衝鋒力戰受傷入骨今因傷發病故臣等遵旨從優議卹或贈爲扎薩克一等塔布囊或授爲輔國公恭候 欽定得旨丹巴著追封輔國公世襲罔替○刑部議覆甘肅巡撫許容奏回民居住之

處嗣後請令地方官備造冊籍印給門牌以十戶爲一牌十牌爲一甲十甲爲一保除設立牌頭甲長保正外選本地殷實老成者充爲掌教如人戶多者再選一人爲副不時稽查所管回民一年之內並無匪盜等事令地方官酌給花紅以示鼓勵從之

十二月庚寅朔日有食之○辛卯諭內閣牧可登著革退刑部侍

郎俟伊承審事件具奏之後再離任刑部侍郎員缺著西安巡撫

武格補授西安巡撫事務仍著馬爾泰署理史貽直協辦○以馬

喇爲工部尙書由護軍統領遷○封科爾沁台吉鄂齊爾爲輔國公○壬

辰諭理藩院西藏一等台吉噶錫巴那穆扎爾色卜騰具奏謝恩

進獻方物從前因伊父噶錫鼎於阿里地方陣亡經頗羅鼎奏請

將噶錫鼎贈爲一等台吉令伊子噶錫巴那穆扎爾色卜騰承襲

聞噶錫巴那穆扎爾色卜騰甚是勤勞效力伊又係康濟鼎之兄

子康濟鼎誠心效力始終不懈並無子嗣今將噶錫巴那穆扎色卜騰格外施恩封爲輔國公世襲罔替○轉吳士玉爲吏部左侍郎調任蘭枝爲吏部右侍郎調兵部○癸巳刑部議准原任西安巡撫武格奏流犯有年踰六十老病龍鍾者請照孤貧之例准其撥入養濟院給以口糧俾得全活餘年從之○廣東布政使楊永斌奏定例鐵器不許出境貨賣而洋船私帶禁止尤嚴粵東所產鐵鍋每連約重二十斤查雍正七八九年夷船出口每船所買鐵鍋少者自一百連至二三百連不等多者至五百連並有至一千連者計算每年出洋之鍋約一二萬斤誠有關繫應請照廢鐵之例一體嚴禁違者船戶人等照例治罪官役通同徇縱照徇縱廢鐵例議處嗣後令海關監督詳加稽查至商船煮食器具銅鍋砂鍋俱屬可用非必盡需鐵鍋亦無不便外夷之處於朝廷柔懷遠人

之德意並無違礙得旨鐵斤不許出洋例有明禁而廣東夷船每年收買鐵鍋甚多則與禁鐵出洋之功令不符矣楊永斌所奏甚是嗣後稽查禁止及官員處分商人船戶治罪之處悉照所請行粵東既行查禁則他省洋船出口之處亦當一體遵行永著為例

○丙申以僧格爲理藩院額外侍郎雙喜爲內閣學士

由內閣侍讀學士遷

○己亥冊諡

大行皇后曰

孝敬皇后頒詔天下○復設福建

督標右營參將一福甯左營閩安右營遊擊各一建甯左營汀州左營延平右營漳州中營興化右營守備各一改撫標中軍遊擊缺爲參將福協右軍守備福建將軍標下中軍守備臺灣北路淡水營守備長福營右軍守備邵武城守右營守備泉州城守營安海汛守備同安營灌口汛守備各缺俱爲都司僉書○辛丑增翁源縣縣下鄉巡檢一博羅縣城仍留原設把總一原防之都司撤

回府城以舊駐惠州府城左營守備移駐長甯增長甯縣屬老虎
坳汛移千總一駐防磔下鄉及長甯縣屬錫場山各增一汛每汛
設外委把總一統歸惠州協轄○癸卯改廣東瓊州協左營守備
興甯和平確州東莞三水四會那扶等營守備各缺俱爲都司僉
書○甲辰靖邊大將軍順承親王錫保奏甯古塔副都統塔爾岱
呈稱 皇上恩旨念塔爾岱宣力可憫令回原任但大兵正值滅
賊之期是塔爾岱雪恥之日若負罪而還何顏見七十有七之老
母且塔爾岱傷痍悉已平復仰懇仍留軍前等語謹此代奏得旨
朕覽塔爾岱所奏爲之惻然若准伊所請朕實不忍若不准則軍
中難得此練習之賢將今暫依所請賞伊母銀一千兩再賞塔爾
岱一千兩資伊用度○奉天府府尹楊超曾奏奉天各屬從前一
切公務皆取給里下總計一歲之科派多於正額之錢糧如遇奏

銷地丁驛站大造編審人丁大計考察官吏等項自臣衙門家人書吏以至治中知府州縣各處均有陋規銀兩名爲造冊之費歲科考試童生自府丞至治中知縣衙門亦有陋規銀兩名爲考試之費至大小官員到任凡修理衙署鋪設器用以及查點保甲換給門牌印捕等官紙張飯食俱行攤派銀兩每項約有數十兩至百餘兩不等更或衙蠹里書從中指一派十侵收包攬弊竇多端臣已嚴飭各屬勒碑永禁並令嗣後徹底澈清不許絲毫派累得旨從來地方科派陋規甚爲民間之擾累楊超會通行查禁辦理甚是但恐相沿已久官吏人等尙有陽奉陰違者又恐日久法弛將來接任之員或有仍襲從前之陋習著將楊超會所奏宣示於外令奉天官吏人等永遠遵行以除積弊以惠閭閻○改山西撫標中軍遊擊缺爲參將殺虎協中軍守備大城陽和高山渾源廣

昌平刑忻州右衛并坪利民神池八角朔州樺林鎮西保德懷仁等營守備各缺俱爲都司僉書○乙巳諭內閣逆賊呂留良以批評時藝託名講學今罪蹟昭彰普天共憤內外臣工咸以罪犯私著之書急宜焚毀爲請朕以爲從來無悖逆之大儒若因其人可誅而謂其書宜毀無論毀之未必能盡卽毀之而絕無留遺天下後世更何所據以辨其道學之眞僞乎以故毀書之議槩未允行頃者翰林顧天成奏稱呂留良所刊四書講議語錄等書龐浮淺鄙毫無發明請敕學臣曉諭多士勿惑於邪說爰命在廷儒臣詳加檢閱茲據大學士朱軾等於其講義語錄逐條摘較纂輯成帙呈請刊刻徧頒學宮朕以逆賊所犯者朝廷之大法也諸臣所駁者章句之末學也朕惟秉至公以執法而於著書者之爲醇爲疵與較書者之或是或非悉聽之天下之公論後世之公評朕皆置

之不問也大學士朱軾等既請刊刻頒布學宮俾遠近寡識之士
子不至溺於邪說朕思此請亦屬可行姑從之以俟天下後世之
讀書者○諭大學士等侍讀學士查克旦見今派往喀爾喀地方
操兵防範著給還侍郎原銜○丙午實授諾爾渾兵部侍郎○丁
未諭大學士等紀成斌久歷戎行曾有戰功是以朕加恩用至總
兵官後因大將軍岳鍾琪極力保薦謂其可以大用始將伊擢用
四川提督令在西路協贊軍務上年岳鍾琪來京陛見將大將軍
印信交與紀成斌護理乃紀成斌隄防疏忽爲賊人所窺始則盜
竊馬駝既則逼近軍營無所忌憚此時紀成斌一籌莫展幸賴樊
廷等奮力出擊以寡敵眾大挫其鋒而賊眾始退紀成斌之罪誠
擢髮難數朕猶暫寬其罪俾得黽勉效力以贖前愆乃伊一年以
來怠忽遂巡每見欽差大臣但言我實乃巴爾庫爾弁兵之罪魁

紀成斌有忝職守深負朕恩著革去提督改爲副將交與岳鍾琪
凡有差遣之處令其效力贖罪若仍不知愧悔著卽參奏嚴究四
川提督著陝西延綏總兵官顏清如補授陝西延綏總兵著陝西
沙州副將張豹補授紀成斌著補授陝西沙州副將○阿蘭泰緣
事降調以阿成阿爲左副都御史由副都統銜遷○改雲南督標中軍守
備廣羅騰越劍州三協中軍守備順雲營守備貴州遵義黔西二
協左右營遊擊平遠定廣二協中軍守備普安永安安順新添平
伐仁懷石阡等營守備廣西新泰思恩平樂慶遠等協中軍守備
上思龍憑崖蘘上林富賀三里麥嶺等營守備俱爲都司僉書○
戊申吏部遵旨議覆直省府州縣等缺地方之要簡不同人才之
優絀各異必人地相宜方於吏治民生均有裨益嗣後除道府員
缺係請旨補授並沿河苗疆一切應行題補之缺仍照舊例遵行

其同知通判知州知縣內經督撫冊報係衝繁疲難四者俱全或兼有三項之缺最爲緊要令各該督於見任屬員內揀選熟練吏治品級相當之員具題調補所遺之缺歸部銓選至衝繁疲難四項內兼有二項以及專有一項之缺據各省冊報十居八九若歸在外題補恐外省調缺太多見任屬員不敷揀選調補之用應照例歸於月分升遷如初選之員於到任後或人缺不稱仍令督撫酌量具題對調再各省丁憂病故在外所開之缺向來扣留知照督撫將試用人員委署今衝繁疲難既經分別則在外所開缺內如係四項俱全或三項相兼者請照舊例扣留令該督撫將見任屬員選擇調補所出之缺將試用人員署理其不兼四項三項之缺歸部銓選至嗣後有應設應改之缺令該督撫卽於改設本內將四項或全或兼或專等因分別聲明直隸各省一體遵行從之

○改四川撫標中軍遊擊缺爲參將○己酉 聖祖仁皇帝實錄
聖訓告成○庚戌封喀爾喀扎薩克輔國公阿努里爲貝子○壬
子諭大學士等貝勒阿寶並伊子衮布在西路軍營甚屬效力阿
寶又帶所屬兵丁防範遊牧殊爲可嘉著賞還伊郡王原爵○癸
丑復設湖北孝感縣馬溪河巡檢一改應山縣平里市巡檢爲平
靖關巡檢移駐三里店○裁四川松潘衛守備缺改設龍安府同
知一照磨一俱駐松潘增南坪巡檢一○改河南督標中軍守備
缺爲都司僉書○甲寅張體義緣事革職以方顯爲貴州按察使
由貴東道遷○是歲琉球國來貢○人丁戶口二千五百四十四萬一
千四百五十六又永不加賦滋生人丁八十六萬一千四百七十
七田地山蕩畦地八百七十八萬六千一百九十頃八十畝有奇
徵銀二千九百七十九萬七千五百一兩有奇米豆麥四百七十

六萬八千四百八十七石有奇草五百一萬七千七百二十七束
茶三十二萬八千七百二十引行鹽五百一十九萬二千三百四
十四引徵課銀三百九十五萬一千一百兩有奇鑄錢十萬四千
八百七十五萬九千六百六十有奇